

42

857.2

961


世界奇病談

無錫顧鳴盛編

上海文明書局發行

## 世界奇病談提要

此編專搜集古今中外及編者親見之希有奇病輯爲一書都凡一百七十種顏曰世界奇病談奇奇怪怪罕見罕聞如俛窺牛渚十色五光如仰矚蜃樓千變萬化洵於病史上別開生面末附怪生十四則或比附印證足以增長新智識或觸類旁通可以啟發舊思想茶餘酒後手此一卷可作醫書讀可作小說觀



北师大图 B2350828

# 敘言

鼻。水。游。蝦。目。瘡。飛。雀。胞。中。法。馬。皮。裏。波。瀾。楊。億。同。懷。奇。稱。鶴。蛻。竇。武。降。  
世。生。與。巨。蛇。腹。墳。起。而。蟲。應。聲。額。瘤。穿。而。蛇。突。出。膽。衡。不。下。名。著。仲。陽。  
腸。截。可。治。方。傳。舊。帙。沙。門。弟。子。一。孕。二。十。春。漢。堡。男。兒。長。眠。十。七。祀。晶。  
體。與。香。孩。輝。映。海。外。奇。談。馬。足。共。魚。眼。齊。來。人。間。異。疾。槃。瓠。狗。種。遑。論。  
半。豕。半。人。褒。姒。龍。漈。何。怪。非。男。非。女。毛。人。尾。種。豈。是。畸。形。髯。婦。髭。兒。詎。  
關。戾。氣。醫。貴。明。理。香。以。死。而。臭。則。生。物。多。反。常。髮。成。蟲。而。肉。化。蝶。假。相。  
因。離。魂。以。現。兩。體。連。牀。小。癆。由。縮。骨。而。來。羣。醫。束。手。蟲。生。子。母。瘞。則。絕。  
根。腹。有。蛟。龍。發。乃。成。癩。食。蝗。食。蟻。異。嗜。不。近。人。情。吐。蛇。吐。雞。怪。症。難。明。  
物。理。貝。母。試。人。面。瘡。口。灌。卽。成。痂。嬰。兒。生。羊。腹。胎。中。哺。之。且。活。喉。簧。腹。  
鼓。堪。稱。希。世。之。音。長。舌。大。陰。無。復。生。人。之。趣。蚊。煙。有。毒。何。古。今。祇。此。一。  
人。龍。食。能。消。遍。中。外。更。無。餘。子。頭。不。病。而。自。炸。曠。世。所。希。乳。無。故。而。忽。

懸。於。今。不。見。肉。球。吐。納。翻。疑。人。亦。戲。球。血。箭。噴。流。豈。意。創。由。微。孔。蛙。聲。  
閣。閣。草。有。車。前。蛇。影。搖。搖。弓。在。梁。上。男。孕。而。來。熊。夢。信。亂。世。之。人。妖。女。  
交。亦。結。蚌。胎。實。熙。朝。之。人。瑞。手。舞。足。蹈。非。出。自。天。然。陰。合。陽。聯。一。由。於。  
人。造。惡。蟲。二。百。萬。一。封。書。毒。殺。夫。人。大。錢。七。十。三。三。角。物。嘔。於。赤。子。美。  
人。半。截。誰。知。鳥。之。雌。雄。寶。物。一。腔。信。乎。胸。有。塊。壘。拒。男。而。宗。祧。不。問。道。  
非。中。庸。爲。奴。而。箠。楚。自。搥。病。豈。正。軌。兩。喉。雙。舌。盡。千。古。之。奇。觀。酒。臭。汗。  
香。實。兩。間。之。疑。問。留。人。有。洞。塞。則。不。洩。接。客。飲。茶。退。而。必。吐。犴。猪。以。食。  
人。爲。癖。奚。翅。虎。狼。矍。雉。因。魔。睡。而。瘡。轉。精。踢。鞠。相。臣。偷。食。東。瀛。軼。事。堪。  
誇。豎。子。嚮。言。中。世。畸。人。所。紀。日。月。本。洪。鈞。所。有。乃。作。掌。文。天。人。之。感。應。  
何。靈。竟。隨。節。氣。指。分。多。少。本。自。遺。傳。臂。可。短。長。初。非。變。幻。地。當。蠅。帶。黑。  
奴。之。睡。鬼。何。多。子。倣。羊。鳴。蒼。穹。之。遇。人。太。酷。胎。成。品。字。近。事。堪。徵。人。放。  
電。光。玄。機。莫。測。膝。端。之。骨。變。佛。怪。矣。漁。夫。背。上。之。肉。成。峰。苦。哉。范。叟。古。  
巴。黃。瘡。毒。蚊。之。刺。螫。可。虞。北。美。白。兒。昏。夜。乃。闕。觀。轉。顯。伊。婁。穆。纏。腰。三。

縛。霜。降。自。除。蒲。傳。正。洗。面。五。人。水。淫。可。晒。晦。翁。體。黑。解。於。漢。帝。一。言。稚。  
子。癩。紅。治。自。東。垣。六。味。蜀。中。蟆。子。嚙。則。生。瘡。沅。水。蠱。蟲。久。而。并。命。窮。形。  
極。象。如。觀。禹。鼎。之。魑。異。見。珍。聞。恍。飲。上。池。之。水。爰。執。生。花。之。筆。移。將。董。  
奉。杏。林。但。披。燼。簡。之。文。勝。讀。仇。遠。稗。史。

民國五年陽九無錫顧鳴盛敘

---

世界奇病談 敘言

# 世界奇病談目次

一	潔癖	二	嚙指癖
三	離魂	四	變色瞳人
五	口鼻黑氣	六	水晶人
七	善饑症	八	長眠人
九	腹中音樂	十	香病
一一	食掛	一二	子母蟲
一三	腸癢	一四	異視
一五	食髮癖	一六	酒臭
一七	皮裏波聲	一八	奇病
一九	頭髮變色	二十	應聲蟲
二一	枯炭病	二二	前陰放屁

二三	笑病	二四	頭顱自炸
二五	陰莖生角	二六	蚊煙毒
二七	四肢有聲	二八	人面瘡
二九	毛髮變硬	三十	截腸病
三一	嗜油髮蟲	三二	瘡肉蝶飛
三三	肉錐	三四	怪肉
三五	異嗜	三六	蛟龍病
三七	縮骨癆	三八	女交得胎
三九	瘡中雀	四十	吐蛇
四一	蛤精病	四二	鼻瘤
四三	長舌病	四四	鼻液成蝦
四五	貓眼瘡	四六	泡中石片
四七	水道出線	四八	乳懸



四九	毛人	五十	陰莖長腫
五一	肉球	五二	額上蟹
五三	吐雞雛	五四	髻婦
五五	眼花	五六	紅絲瘤
五七	砂蚤	五八	長髯
五九	骨癢	六十	血箭
六一	銅皮病	六二	兩喉
六三	有尾人	六四	膽衡
六五	女化男	六六	心破
六七	鼻毛暴長	六八	香孩兒
六九	喉簧	七十	消食龍
七一	枯草熱	七二	腹中蛙
七三	頭中珠	七四	馬蹏足

七五	金魚眼	七六	接客病
七七	石癢	七八	男子孕
七九	洪水熱	八十	皮異
八一	妬癡	八二	足脛流髓
八三	反嚼症	八四	肉化骨
八五	手足異	八六	吐糞病
八七	虱蠱	八八	巨人
八九	無陰門	九十	筋解
九一	歪嘴	九二	髭兒
九三	接生手	九四	大頭孩
九五	前陰出糞	九六	毛孔血
九七	洞胸	九八	墮指病
九九	茶病	一百	喉臭

百一	人生角	百二	兒死復活
百三	嚮言	百四	老婦化龍
百五	三縛	百六	入地不死
百七	男化女	百八	肝脹
百九	脂夜	百十	足寫大字
百一一	巨囊	百一二	二形人
百一三	白兒	百一四	塌鼻夜叉
百一五	色魔	百一六	蟆子
百一七	眉聽	百一八	中異物毒
百一九	不洩病	百二十	食人癖
百二一	禿頂	百二二	催眠成瘖
百二三	蠱毒	百二四	肥人
百二五	中烏喙毒	百二六	縮陽

百二七	水淫	百二八	竊食癖
百二九	黃瘡	百三十	書中毒
百三一	大食	百三二	羊鳴
百三三	鎖肛	百三四	氣癭
百三五	嫌疑癖	百三六	二十四節氣病
百三七	尸蟲	百三八	打病
百三九	香汗	百四十	膝端佛
百四一	葡萄胎	百四二	肉峯
百四三	拒男	百四四	胃中寶物
百四五	諸竅流血	百四六	掌上天文
百四七	侏儒	百四八	腹語
百四九	雙舌	百五十	龜頭生菌
百五一	耳毛	百五二	陰中怪物

百五三 長短臂

百五四 多節指

百五五 半截美人

百五六 人身奇光

百五七 舌腫

百五八 睡病

百五九 夜眼

百六十 怪癖

百六一 塌頂

百六二 少節指

百六三 肥病

百六四 毫異

百六五 恥短

百六六 兩面

百六七 骨軟病

百六八 流精

百六九 肉顫

百七十 鬼交

附怪生十四則

一 人妖

二 一孕二十年

三 產器物

四 羊兒

五 腹中怪

六 異胎

世界奇病談 目次

八

七 猪女

八 品字胎

九 兩陰相連

十 兩首四腿

一一 猴人

一二 人蛇並生

一三 肉塊

一四 老翁

世界奇病談目次終

# 世界奇病談

無錫顧鳴盛編

## 一 潔癖

今奧地利國王生有潔癖。不喜與人握手。遇至戚密友。相見時行禮。率不過頷之而已。卽伉儷間。亦罕見其攜手同行也。嘗偶染寒疾。召醫者至。醫者欲覓手診脈。王怫然曰。余寧死不願與他人之手相觸也。醫者唯唯。乃但察其神色。授以藥而去。病亦旋愈。又所御衣服。微有不潔。卽便撤換。嘗讀馮贄雲仙雜記。稱王維性好潔。居輞川。地不容浮塵。日有十數掃飾者。使兩童專掌縛帚。而有時不給。與王庶幾近之。

## 二 嚙指癖

法國巴黎某小學校。共有學生二百六十五人。而具嚙指甲之癖者。有六十三人。適占五分之一。又巴黎附近某村之學校中。學生具嚙指甲

之癖者。每二十一人中。有十一人。得半數強。衛生局醫官查悉。謂於體育有礙。現正研究改良之法焉。

### 三 離魂

臨桂鼓樓底潘姓家。湘人祝雲亭居焉。祝年三十而鰥。誓不再娶。膝下有一女。女年十四。一日者。忽自覺已形作兩人並臥。真假不辨。問亦無對。其父邀鄉人之擅辰州符者視之。則曰。此離魂也。古有用辰砂人參茯苓濃煎湯服者。盍姑試之。如其言果愈。蓋真者氣爽。假者自化矣。

### 四 變色瞳人

貓之瞳人。午一綫。子正圓。能隨時變形。不意人且能隨時變色。法京巴黎有一女子。其瞳人迥異尋常。蚤起時現青色。七八時變綠色。十時。十一時。深綠色。正午紅色。一二時淡紅色。三四時白色。五六時黑色。夜間灰色。諸醫學家聞而往觀之。鑽研久久。迄莫得其要領。異哉。

### 五 口鼻黑氣



昔汴洛間一士人。口鼻中氣出。盤旋不散。凝如黑蓋。十日後。漸至肩胸。與肉相連。堅勝金鐵。無由飲食。醫謂此多因瘡後得之。煎澤蘭葉湯。日飲三盞。連服五日。愈。然世之患瘡者多矣。不聞有櫻此寡二少雙之疾者。是殆戾氣所鍾歟。

#### 六 水晶人

沃爾羅甫者。著名之水晶體也。全身肌革筋骨。莫不表裏洞明。曾遍游歐洲各國。獲觀覽資累萬。現已沒於脫浦列芝。德國來淳企希大學擬出資市其遺骸。供學者實地研究。以索價殊昂。尙無定議。昔扁鵲飲上池水。能洞見癥結。已屬奇聞。何圖海外異人。其構造尤出情理之外。是誠匪夷所思矣。

#### 七 善饑症

江南逆旅中。一老婦。啖物不知飽。徐德占過之。老婦愬以饑。其子恥之。對德占以蒸餅噉之。盡一竹簍。約有百餅。猶稱饑不已。日飮一石米。隨

而利之。饑腹如故。京兆醴泉主簿蔡繩亦得饑疾。每饑立須噉物。稍遲則頓仆悶絕。懷中常置餅餌。雖對貴客亦須齟啖。繩有美行。博學工文。爲時聞人。終以此不幸。無人識其疾者。按西人名此症曰 Bulimie 爲知覺性胃神經疾患。其致疾之由。疑基於延髓菱形窩之饑餓中樞興奮而然。亦不詳其治法也。

八 長眠人

德國北境漢堡有一男子。名梅兒。長眠如死。已十七年。惟氣息未絕耳。一日附近失火。警鐘亂鳴。忽焉驚覺。起問家人。何以人聲鼎沸。曰救火耳。叩以十七年中之事。瞠目不能答。英國愛爾蘭島亦有一男子。名生遜。性嗜眠。自一千八百七十七年臥牀之後。迄今已閱三十餘年。未嘗離牀跬步。平時飲食。全恃其母飼養之。無何母抱病。入醫院診治。家中祇餘生遜一人。主遜因餓思食。欲起牀散步。顧久臥體弱。行動維艱。幸鄰人送至教會醫院。得以暫時留養。迨母病既愈。攜之歸家。則仍酣睡。

如初。又澳洲南部有一小小民族。無論男女長幼。莫不善睡。蟄伏殆如蟲類。三四日纔一醒。醒後略食果實。又睡。故有蟄人之稱。

### 九 腹中音樂

一婦有異疾。每腹脹則腹中有聲如擊鼓。遠聞於外。人行過其門者。皆疑其家作樂。腹脹消則鼓聲亦止。一月一作。百醫皆莫明其疾。更有一孕婦。腹內如鐘鳴。一貧士用鼠窟前畚土研細爲末。每服二錢。麝香湯調服。其疾卽愈。俄國託穆塞克府某醫院。有一英國少婦就醫焉。自云病狀極異。每食麵包諸物之後。腹中隨唧唧有聲。儼如鼠鬪。若更飲牛乳咖啡等物。則腹中之聲愈大。有時聲聞戶外。恍若鼓鐘並奏。必經十餘分鐘之久。腹中食物已漸消化。厥聲始止。聞者莫不稱奇。卽院中諸醫生亦不知其爲何病。有德國某醫生欲爲刳腹審視。以少婦不可而止。古今中外皆有是病。而卒莫能抉其疑。豈婦女特有之病症歟。

### 十 香病

昔有以岐黃著名者。遇一人死。而其屍視生時長尺許。因卽令人挑宿糞兩擔。置榻下。穢氣不可向邇。鍵其戶。逾時。自牖隙掩鼻睨之。身已縮如故。以藥灌之。遂甦。蓋其人性愛香。房中術。冰麝不能一夕離。經絡爲之走竄。縱舒氣散而絕耳。故以臭氣斂之。其實非死也。此醫殆深明物理學者。

一一 食掛

眉州米思古得疾。不能食。聞葷腥則嘔。惟用大鑊旋煮湯。沃淡飯數數食之。醫莫能治。史載之曰。俗輩不讀內經而妄醫人之疾。可歎可駭。君之疾。正在素問經中。名曰食掛。凡人之肺六葉。舒張而蓋。下覆於脾。子母氣和則進食。一或有戾。則肺不能舒。脾之爲弊。故不嗜食。遂授一方。以清氣潤肺爲治。服三日。病者鼻聞肉味。覺香。取啖之。甚美。此宋人載於傳記。考之素問。並無食掛之病。或記者假託耳。

一二 子母蟲

一婦人忽產蟲一對。在地上能行。長寸餘。自後月生一對。以苦參加殺蟲藥爲丸服之。又生一對。埋於土中。過數日。發而視之。大如拳。名子母蟲。從此絕根。

### 一三 腸癢

傅舍人爲太學博士。日忽得腸癢之疾。滿腹發癢。又無搔處。欲笑不得。欲哭不得。數年而愈。古有產後腸癢者。或人暗取針線袋安所臥褥下。勿令人知。然驗否未可知也。

### 一四 異視

美國阿倭吾里市。有一少年。名柏魯迭拉者。其視官之奇異。誠曠古所未聞。彼之入於目者。明明順也。而皆以爲逆。如下樓梯。則目爲上。而墜落屢矣。馬車從右來。則目爲左。而衝仆又屢矣。因求治於紐約專門醫家希蒙博士。據云。此係視神經有異狀之故。元末臨川道士蕭雲泉。眼中視物。亦皆倒植。請四明呂復治。問其因。曰。某嘗大醉。盡吐所飲酒。熟

睡至天明。遂得此病。復診其脈。左關浮促。卽告之曰。傷酒大吐。上焦反覆。致倒其膽腑。故視物皆倒植。不內外因。法當復吐以正其膽。遂用藜蘆瓜蒂爲粗末。水煎。使平旦頓服。以吐爲度。吐畢。視物如常。又有一婦人。視諸物皆如曲弓。視界尺之直。亦如曲鈎。藥莫能治。

一五 食髮癖

美國羅生埠。有幼女名飛路者。抱一奇疾。每日必食頭髮少許。先後十月。未嘗間斷。醫者剖腹視之。食而不化之髮。已積重一磅餘矣。叩其因。則曰。前在某戲院觀劇。適屋宇傾圮。身負重傷。惟稍食頭髮。則痛似略減。爲日旣久。遂致成癖。誠異聞也。

一六 酒臭

義寧初。一縣丞。衣纓之冑。年少時。甚有丰采。涉獵書史。兼有文性。其後沈湎於酒。老而彌篤。日飲數升。略無醒時。得病將終。酒臭聞於數里。遠近驚愕。不知所由。如此一旬。此人遂卒。故釋典戒酒。謂能令人昏癡。今

臨亡酒臭。彰其入惡道耳。其然乎。其不然乎。

一七 皮裏波聲

有一人遍身皮底。混混如波浪聲。癢不可忍。抓之血出。不能解。謂之氣奔。以人參、苦杖、青鹽、細辛各一兩。作一服。水二碗。煎十數沸。去渣。飲盡。便愈。

一八 奇病

參政孟庾夫人徐氏有奇疾。每發於聞見。卽舉身戰栗。至於幾絕。見母與弟皆然。至死不明。又惡聞徐姓。及打銀、打鐵聲。嘗有一婢。使之十餘年。甚得力。極喜之。一日偶問其家所爲業。婢曰。打鐵。疾遂作。更不欲見。竟逐去之。醫莫施其術。

一九 頭髮變色

德京柏林瘋人院中。有一瘋婦。入院求治。安靜之時。髮作淡黃色。稍發狂疾。則忽發褐色。此與變色之瞳人。性質殆相似焉。



二十 應聲蟲

淮安士人楊勗。中年得一疾。每發聲。腹中輒有小聲應之。數年間。其聲寢大。一道士見而驚曰。此應聲蟲也。久不治。延及妻子。宜讀本草。遇蟲所不應者。當取服之。勗如言。讀至雷丸。蟲乃無聲。頓餌數粒。遂愈。醫官蘇澄亦治一人。云。自古無此方。今吾所撰本草。網羅天下藥物。亦謂盡矣。試將讀之。應有所覺。其人每發一聲。腹中輒應。唯至一藥。再三讀不應。至他藥。復應如初。澄自爲處方。以此藥爲主。其病自除。或云。用板藍汁一盞。分五服服之。亦效。

二一 枯炭病

美國紐約一平民。年二十八矣。四年前。左手忽木強。運動不自如。旣而自腕至臂。復自臂至上膊。全不仁也。久之。木強益甚。雖毫忽不能動。膚色始變灰褐。繼乃純黑。摘之。皮緊如板。叩之。肉堅如木。某日。偶爲他物所觸。患肢竟致中折。審視斷面。色黑似漆。擲几上。橐橐有聲。儼然木炭。



也。此人性好讀書。雖一肢已廢。右手仍不釋卷。無何。亦罹同病。進行且加速焉。後二。年。左右兩下肢。又如之。此人遂癱臥病榻。雖欲一轉側而不可得矣。歐美著名之醫學大家及生理大家。爭往觀視。並乞其墮折之手腕。攜歸檢察。噫。病之怪。莫怪於此矣。

## 二二 前陰放屁

灌陽某士人妻。老儒女也。未嫁前。夙有隱疾。然德容兼備。士人敬愛之。初不知其何患也。會士人舅氏由閩中乞假歸。留之食。且令妻謁見焉。行禮畢。甫起立。妻下部忽哧哧有聲。一若洩下氣者然。時當夏月。衣服單薄。故聲殊清晰。士人羞且怒。遽責妻見尊長無禮狀。聲色俱厲。妻赧不自勝。欲言又止。既舅氏去。妻還室。遂泣告良人曰。頃者見責。寃妾實甚。妾生長清門。夙嫻儀節。詎敢對臨長上。爲非禮之舉動。所以有此者。實抱一隱疾耳。言訖。嗚咽久之。士人既得其故。自悔孟浪。敬愛有加。屢勸妻治之。卒以私處故。遂罷。

二三 笑病

菌蕈有一種。食之。令人得乾笑疾。土人戲呼爲笑矣乎。不言其可以致死也。吳下馬醫科巷有潘媪者。一日食菌後。覺腹中有異。乃至牀上臥。俄而吃吃笑。俄而大笑。驚謂其女曰。殆矣。吾食笑菌死矣。其言雖如此。而笑仍不絕聲。未幾起而立。旋仆。遂伏地狂笑不止。

二四 頭顱自炸

粵人梁某。蕪湖江口寶興隆米肆司帳也。一日午膳時。忽自覺頭痛殊劇。食未終。卽入室倚坐。頭顱突然炸裂。聲若鳴礮。肆中人聞聲趨視。見梁某頭顱綻裂。作石榴形。面目模糊。血流如注。誠世界未有之奇病也。

二五 陰莖生角

日人渡邊虎太言。嘗見一老工。其龜頭冠上半部。生一堅韌物。大如兒指。彎若鷹爪。根在龜頭冠左側。占全部八分之五。外盡冠狀溝。內擁外尿道孔。左半一隅。下延而連繫帶部。質尤硬。根廣闊。末微銳。形似牛角。

凹凸層層。譬若環輪。微觸之。尙無妨。大動則痛殊甚。苟引之。且綻裂。平時便旋輒痛。行則牽及少腹。又下體常覺不適。當甫患生時。不過一堅硬小核。久之乃加大。歷十一年而成今物。是年春。曾由某院醫生爲割去之。未幾又生。且左右各一。九月再入某醫院奏刀。乃昨歲仍發。大更逾前。無以名之。遂名之曰生角。

二六 蚊煙毒

吳門葉天士。良醫也。夏日偶過磨坊。見健者方擁磨盤旋。問曰。爾非此地人耶。曰然。曰。速歸去。不一月必死。磨者將信將疑。且問故。曰。爾夜來必用蚊煙乎。曰然。曰。殆矣。是物雖辟蚊。然久受其毒。不可救。汝速歸。猶及家也。磨者大慟。卽以是日奔歸。至一處塘上。夜昏遇雨。見小舟。求附行。登舟。卽有一老翁坐艙中。磨者默然向隅。翁問故。告之。翁曰。果然。然幸遇我。可不死。磨者長跪哀之。遂同至翁家。翁飲以藥。浴以水。灸以火。蒸以桶。凡三越月。曰。可矣。令入城。適葉又經其處。見磨者勇健如初。因

叩之。磨者述所遇。葉卽同磨者往覓翁所。至則行矣。

二七 四肢有聲

一人寒熱不止。經月後。四肢堅如石。以物擊之。一似鐘磬聲。日漸瘦惡。後用茱萸木香等分煎湯飲。遂愈。此與前述之枯炭病。有相似者。

二八 人面瘡

江左數十年前有商人。左膊上有瘡。如人面。亦無他苦。商人戲滴酒口中。其面亦赤。以物食之。凡物必食。食多覺膊內肉漲起。疑胃中飽也。或不食之。則一臂痺焉。有善醫者。教其歷試諸藥。金石草木悉與之。至貝母。其瘡乃聚眉閉口。商人喜曰。此藥必治之也。因以小葦筒毀其口。灌之。數日成痂。遂愈。

二九 毛髮變硬

一白人忽變黑。毛直根根如鐵絲。雖能飲食。但不言語。狀似大醉。名曰無血讚。又曰血潰。又有一人。眼赤鼻張。大喘。渾身出斑。毛髮如銅鐵。醫

言是胃中熱毒氣結於下焦而然。用白礬滑石各一兩爲末。作一服。水三椀。煎至半合。不住飲。候靜乃安。或用五靈脂爲末二錢。酒調下。

✓三十 截腸病

梧州東門外一土工。體素健。一旦大腸頭出寸餘。痛苦欲死。直候乾。自退落。則又出如前。有江湖醫告之曰。此截腸病也。若腸盡。乃不治。惟初截寸餘可治。因授以方。則係用脂麻油盛之。以臀坐之。試之。腸果自入。或謂飲大麻子油數升。亦佳。然未實驗也。

三一 嗜油髮蟲

一人日飲油。必四五升以來。方始快意。長得喫則安。不爾則病。此是髮入胃。爲氣血所裹。化爲蟲也。用雄黃半兩爲末。水調服。蟲自出如蛇形者。置於油中。逡巡間。連油潑之。長江。

✓三二 瘡肉蝶飛

有一人因著艾灸火。痲便退落。瘡內出鮮肉片子。飛如蝶形狀。騰空而

去。患處痛不可忍。醫者云。是血肉俱熱也。用大黃、朴硝各半兩爲末。水調下。微利卽愈。

三三 肉錐

一人忽然徧身肉出如錐。旣癢且痛。不能飲食。此名血擁。若不速治。潰而膿出。以赤皮葱燒灰淋洗。喫豉湯數盞自安。又有一人手足甲忽然長。倒生肉刺如錐。痛不可忍。喫葵菜自愈。蓋二者實相同也。

三四 怪肉

鎮陽有士人嗜酒。日飲數斗。飲興一發。輒不可遏。一夕大醉。嘔出肉塊。厥狀如舌。初無痕竅。至欲飲時。則眼徧其上。轟然而起。家人沃之以酒。立盡。至常日所飲之數而止。遂投之猛火。忽自躍出。裂爲數十片。士人自此惡酒不飲。更有一男子。自幼喜飲酒。至成丁後。日飲一二斗。不醉。片時無酒。叫呼不絕。全不進食。日就羸弱。其父用手巾縛住其手足。不令動搖。但扶少立。卻取生辣酒一罈。就於其子口邊打開。令酒氣衝入。

口中。病者索飲。堅不與之。須臾。口中忽吐物一塊。直入鑿中。卽用紙裹鑿口。用猛火燒滾。約酒乾一半。開視之。其一塊如猪肝樣。約三兩重。週園有小孔如針眼。不可數計。棄之於江。飲食復舊。雖滴酒亦不能飲矣。

### 三五 異嗜

巴西人好食黃蟻。雜以樹脂。儼如酒漿。非洲數處土人。嗜食白蟻。或生食。或煮食。視爲珍品。印度及東印度之土人。亦以白蟻和麵作餅啖之。希臘、阿拉伯、波斯亞、斐利加、馬達加斯加人。均好食蝗蟲。澳洲土人。非洲西印度土人。及美洲數處土人。地中海東岸一帶人民。多喜食飛蛾。就中有一種飛蛾。厚如人指。更有數種。膽汁饒多。狀如蘋果。試飾以嫩葉。驟見之儼如蘋果之花萼。地中海居民。嘗以之賣於君士但丁市中。希臘人喜食蟬。古時學者著述中。每盛稱其美味。西印度人。又喜食櫻欄上之青蟲。土耳其婦人。喜食甲殼蟲子。卽線形蠕蟲也。羅馬貴族。亦以蟻爲貴重之食物。厥名谷西。必飼以麵酒。肥而食之。非洲中部之瀕



湖土民。每於湖邊捕無數細蟲。舂爲餅食之。中美洲土人。喜啖蛾子餅。古羅馬貴人重視蝸牛。嘗餵以米穀。候壯大肥美。然後食之。印度某王。最愛炙蠕蟲食之。嘗進於飯後。旅居土耳其京城之阿拉伯人亦如之。太平洋中新加列唐尼島之土人。每取徑寸大之蜘蛛。炙而食之。卽文明之歐洲人。亦有喜食蜘蛛者。印度人尤嗜食蜈蚣。德人某曾親見一印度小兒。自地中掘得蜈蚣一條。約長二尺。隨納口中食之。食蟲至此。蔑以加矣。此亦如粵人之嗜蛤蚧。閩人之嗜肉蛆。同一異性也。

三六 蛟龍病

古有患者。飲食如故。發則如癩。面色青黃。小腹脹滿如孕。醫者診其脈。與證皆異。而難明其主療。忽有一山叟曰。聞開皇六年。灞橋有患此病。蓋因三月八日。水邊食芹菜得之。有識者曰。此蛟龍病也。爲龍遊於芹菜之上。誤食而病也。遂以寒食飴每劑五合服之。數服後。吐出一物。雖小而似蛟龍狀。有兩頭。其病自此獲痊。



三七 縮骨癆

世有奇疾終莫能曉。昔呂縉叔以制誥知潁川。忽得疾。身體日漸縮小。人不能醫。臨終僅如小兒。明社既覆。一儒者欲殉國。屢擬自裁。嗣念諸種死法。靡不痛苦。忽得一計。遂日以醇酒婦人爲娛。冀得自戕。乃久之不死。惟背曲如弓。厥狀若蝦。其後愈屈愈甚。殆亦縮骨癆類也。惜終無識之者。

三 女交得胎

正德間。上元縣錢臣。醉與妻李氏交媾。爲妹所窺。次早。臣出。姑詰嫂夜來事。淫興遽發。嫂戲與姑效交歡狀。兩陰相合。將夫遺精流入小姑陰。經閉腹高。遂成胎。姑之舅凌銑。疑有私情。告官鞠之。得其實。議得李氏。錢臣、錢氏等所犯。俱依不應得爲而爲之事。合依律卽決。照律取贖。錢氏仍候所孕身免。給與錢臣收養。照舊配與凌銑次男爲妻。兩家毋得復生異議。受孕間接而由於女。誠異聞也。

三九 瘡中雀

一人左目上臉。忽生一小瘡。其形長圓。有如鴨卵。其根如弦。恆偃其目。不能開。金州防禦使崔堯封飲之酒。令大醉。便與割去。瘡既破。中有黃雀飛鳴而去。不知何故。

四十 吐蛇

佗行道。見一人病咽塞。嗜食而不得下。家人車載。欲往就醫。佗聞其呻吟。駐車往視。語之曰。向來道邊有賣餅家。蒜齏大酢。從取三升飲之。病自當去。卽如佗言。立吐蛇一枚。縣車邊欲造佗。佗尙未還。小兒戲門前。逆見。自相謂曰。似逢我公車邊病是也。病者前入坐。見佗北壁。縣此蛇輩。約以十數。

四一 蛤精病

北齊時。有人患腳跟腫痛。諸醫莫能識之。徐之才曰。蛤精疾也。由乘船入海。垂腳水中。疾者曰。實曾如此。之才爲剖得蛤子二。大如榆莢。

✓四二 鼻瘤

華州富室兒。年可十四五。臥一巨牌下。牌上大書云。能療此兒。酬絹千匹。時狄梁公應制入關。路由華州。闐闐之北。聚觀如堵。公卽就觀之。見兒鼻端生贅。大如拳石。根蒂綴鼻。纔如食筋。或觸之。酸痛刻骨。公因令扶起。卽於腦後下鍼寸許。仍詢病者曰。鍼氣已達病處乎。病人頷之。公遽抽鍼。而瘤贅應手落。曾無病痛。

✓四三 長舌病

駙馬剛哈刺咱慶王。因墜馬。得一奇病。兩眼黑睛俱無。而舌出至胸。諸醫罔知所措。廣惠司卿聶只兒。乃也里可溫人也。嘗識此證。遂翦去之。頃間復生一舌。亦翦之。又於真舌兩側各去一指許。卻塗以藥而愈。時元統癸酉也。廣惠司者。回回之爲醫者隸焉。

✓四四 鼻液成蝦

一人鼻中。常有腥臭水流。出。或日。偶以椀盛之。則變爲鐵色蝦。如粳米

大走躍不住。以手捉之。仍化爲水。此肉壞也。宜食雞肉。一日二次。任意饌食。月餘愈。

四五 猫眼瘡

有一人。面上及遍身。皆生瘡。似猫兒眼。有光彩。無膿血。但痛癢不常。飲食減少。久則透骨。名曰寒瘡。多喫魚雞葱韭。自愈。

四六 泡中石片

一男子。渾身生燎泡。如甘棠梨。每個破。必有水。內有石一片。如指甲大。既而泡復生。抽盡肌肉。不可治。急用京三稜、蓬莪朮各五兩爲末。分三服。酒調連進。愈。

四七 水道出線

一婦產後。水道中出肉線一條。長尺餘。動之則痛欲絕。先服失笑散數服。次以帶皮薑三斤。研爛。入清油二斤。煎乾爲度。用絹兜起肉線。屈曲於水道邊。以煎薑熏之。冷則熨之。一日夜。縮其大半。二日則盡。又再服。

失笑散。芎歸湯調理。如肉線斷不可治。

✓四八 乳懸

無錫西鄉一婦產後。兩乳忽然細小下垂。痛不可當。是日乳懸。用芎歸各二斤。內用半斤煎水服。餘以燒煙熏口鼻。二料乃愈。

四九 毛人

南美智利國牧人利噶。墮地時。遍體茸毛。儼似野人。年漸長。毛亦漸褪。今二十有一歲矣。除面部、頸項、兩臂、肩胛、及胸前外。餘仍茸覆如故。就中如臀部及兩大腿之毛。尤濃密剛粗。長幾寸許。色深褐。雖豕鬣不若也。十年前。歐羅巴洲中心之丹馬國。亦有一毛人。然與此迥殊。惟面部鬚鬣及脰漸稀。故綽號獅子頭。此等毛人。雖不多見。然竟有之。與猩猩拂拂。殆相去無幾也。

✓五十 陰莖長腫

一少年陰莖挺長。腫而痿。皮塌常潤。磨股難行。兩腿氣衝上。手足倦弱。

有人教以用小柴胡湯加黃連。大劑行其濕熱。少加黃蘗。降其逆上之氣。腫遂漸消。然莖中硬塊未盡也。仍以青皮爲君。佐以散風之藥。爲末服。外以絲瓜汁調五倍子傅之。愈。別有一人。但莖頭腫大如升。光若魚泡。以二陳湯加升麻青黛牡蠣水煎服。二劑亦愈。

五一 肉球

一人口內生肉球。球有根線。長五寸餘。作釵股狀。臭惡不堪。患人亦自厭惡。每飲食。必先吐出肉球。方可。否則不能咀嚼也。試以手輕捏之。則痛徹心肺。困不可言。一僧人告以水調生麝香一錢。服數日。當驗。後不知若何。

五二 額上蟹

都下兒患頭疼。不可忍。有回回醫官用刀開額上。取一小蟹。堅硬如石。尙能活動。頃焉方死。疼亦遂止。當求得蟹。至今藏之。又平江閭門過客。馬腹膨脹倒地。店中偶有老回回。見之。於左腿內割取小塊。出。不知何

物也。其馬卽騎客而去。此夏雪簑云。

### 五三 吐雞雛

建元中。褚澄爲吳郡太守。百姓李道念以公事到郡。澄見謂曰。汝有重疾。答曰。舊有冷疾。至今五年。衆醫不瘥。澄爲診脈。謂曰。汝病非冷非熱。當是食白淪雞子過多所致。令取蘇一升煮服之。始一服。乃吐出一物如卵。涎裹之。動。開看是雞雛。羽翅爪距俱足。能行走。澄曰。此未盡。更服所餘藥。又吐得如向者雞十三頭。而病都瘥。

### 五四 髯婦

西婦每千人中。生鬚髯者多至二百人。其中百五十人。其髯僅如毳毛。餘四十人。頗有于思之象。四十人中。更有十人。竟長髯矣。又凡患精神病之婦人。有髯者必居多數。計每千人中。有四百八十一人。其中更有五十八人亦屬長髯。巾幘也。而鬚眉焉。是誠有不可思議者。

### 五五 眼花



一人眼前常見諸般禽蟲飛走。以手捉之則無有。此乃肝膽經爲疾。用酸棗仁、羌活、元明粉、青箱子花各一兩爲末。每服二錢。水一大盞。煎至七分。和滓飲。一日三服。又一人酒色過度。眼見空中有五色物。稍近。變成一美婦人。亭亭玉立。徐之才謂是色慾多。大虛所致。又一人患心疾。見物輒如獅子。程伊川教以手直前捕之。見其無物。久久自愈。又一婦病熱。目視壁上。皆是紅蓮花。醫用滾痰丸下之。愈。同一眼花。而其因不同。故治法亦各殊也。

五六 紅絲瘤

有人問李東垣曰。某生一子。一歲後。生紅絲瘤而死。後生四子皆然。何也。曰。乃汝腎中伏火。故精有紅絲也。俗名胎瘤。汝試以精驗之。果然。令服滋腎丸。其妻服六味地黃丸。後受胎生子。前證不作。

五七 砂蚤

美洲沙漠之海岸。多產一種蚤類。名曰砂蚤。其雌者善嚙人。螫刺皮膚。



而吸吮血液。嚙後皮膚必然焮腫壞爛。又患生不測。昔年英吉利某探險隊旅行至此。爲砂蚤所嚙。不久卽相繼斃。彼時同行者九人。得慶生還者僅二人。其七人中。三人死於破傷風。三人死於壞疽。一人死於大頭瘟。因此等惡毒之病。皆續發於一嚙之後也。砂蚤之危害有如此。

#### 五八 長髯

法國有銅匠某甲。身材短小。不過五尺。而鬚髯則長九尺。行時必以手引鬚。方免曳地。英商某異之。欲挈以遠行。博觀覽資。許先贈萬金。甲怫然曰。是玩弄我也。必不可。乃止。古今人鬚髯之長。殆無有過於此者。

#### 五九 骨癢

洛中一農夫。值田間收稻。忽遍身癢入骨髓。一老醫聞之曰。此痰氣也。用食鹽九錢。泡湯三碗。每進一碗。探而吐之。三進三探。則不癢矣。好事者。試令患人爲之。果驗。

#### 六十 血箭

前寓羊城。鄰有民家女。其母教以縫紉。針偶觸指。皮破血出。竟如連珠。箭之迸射。女初不爲意。後見流血不止。乃駭呼阿母。母爲施種種法。俱無效。女駭極而暈。面白如紙。惶遽間。有人以洋醫告。遂急昇至天主教堂。洋醫爲設法止之。然溢血已椀許矣。後其家人問此何故。洋醫躊躇久之。始告之曰。此血友病也。雖可治。然一遇外傷必發。傷大者且不救。直流血至死耳。故欲防之。必慎不負創乃可。

六一 銅皮病

江左一僮父。膚色如常人。壯年時。面上一旦生斑。徐徐融合。遂變茶色。繼又變青銅色。儼似印度人。故名之曰銅皮病。居無何。兩手上膊、足背、下腿亦如之。然手心、足心及指趾間之爪甲。俱不變色。但呈蒼白耳。又無何。胸之下。腹之上。如蛇纏腰。周圍一匝。亦如之。蓋適束帶處也。未一年。口脣、兩腮及喉頭數處之內皮。亦如之。滌之不退。拭之不去。形態醜惡。逾於藍面之盧杞。爾時患人鬱鬱不思食。嘔惡腹瀉。體軟如絲。頭痛。

眩暈心跳身痛腰疼爲甚。按之益烈。羣醫無識之者。旋聞一覺不醒。遂離人世。死後患處膚色青黑如故。西醫謂是副腎受病。惜未審有無治法耳。

✓ 六二 兩喉

一人每飲食輒若別有一喉。斜過膈下。徑達左脅而作痞悶。試以手按之。則瀝瀝有聲。後服控涎丹十粒。少時痞處熱作一聲轉瀉下痰飲二升。及再飲食則正下而達胃矣。由是觀之。此人仍一喉耳。

六三 有尾人

去年駐紮緬甸之法國軍隊。自緬甸赴東印度。道經印度乞隆烏地。雨暴至。適道旁有土屋一所。亟往避焉。至則已有多人在內。肩門弗納。無已。姑破扉入。則見類似沙彌者四人。面壁禮佛。皆面如獼猴。腿臂極長。尻際垂尾。長可尺許。足趾間亦握持物件。軍隊怪而問之。方知爲阿霍姆人種。固仇視白人者。當時軍隊頗優遇之。並出攜帶之快鏡攝一

小影。計男一女。小兒一。分寄各埠。供人觀覽。

六四 膽衡

一產婦因事大恐而病。病雖愈。惟目張不閉。人皆不能曉。問於錢仲陽。錢仲陽曰。病名膽衡。煮郁李仁酒。飲之使醉。卽愈。所以然者。目系內連肝膽。恐則氣結。膽衡不下。郁李仁可去結。隨酒入膽。結去膽下。目自能閉矣。如言而效。

六五 女化男

前清時。山東濟寧有婦人。年四十餘。寡數年矣。忽生陽道。日與其子婦狎。久之。其子鳴於官。以事屬怪異。律無明文。乃令閉置空室中。給其飲食。東西諸國。向不聞有此等事。故至今無有能明其理者。

六六 心破

噶林阿。德國普魯士律師也。年事老矣。顧體殊健碩。自奉亦腆厚。一日早餐後。自廁出。坐未定。忽大叫一聲而死。家人立報警署。並趨召醫師。

至。至則屍體業冷如冰。面色如敗灰。診察久之。杳無朕兆。警長輩遂以該家屬等爲嫌疑犯。纍纍繫署中。而號稱大偵探家。亦四出探索其真相。爲推廣名譽地。既而某醫科大學。請願警署。求得噶林阿屍體實行解剖。俾瞭然致死之原因。果得許可。旋由該大學簡單報告云。驗得已故律師噶林阿君屍體。全身如常。惟心囊緊張。捏之似一充實之囊。左心室近心尖處。裂有一孔。其方向一依心筋纖維。彎曲如管。故孔之兩端不相對也。孔中則充滿凝血。據此病變。該律師實係心臟破裂而死。其叫號仆地時。必兩手捧心。咬牙跌足。警署得報後。立委法醫柏倫偕助手二人。前往該大學覆檢。證明確實。乃將噶林阿家屬開釋。

六七 鼻毛暴長

一人鼻中出毛。晝夜可長一二尺。漸漸粗圓如繩。痛不可忍。雖忍痛摘去一莖。仍復更生。此因食豬羊血過多所致也。用乳香。硃砂各一兩。爲末。飯圓梧桐子大。空心臨臥各一服。水下十粒。自然退落。

六八 香孩兒

俄國中部某鄉。有農民沙氏者。以耕種爲生。婦年三十。昨歲有娠。頃已免身。視之。男也。形狀毫無異常。惟竟體芬芳。天陰稍稍輕淡。晴霽則香氣撲鼻。當地醫家咸就訪之。了不知其所由。繼有德國某醫生。甫自柏林來。聞其異。遂寄寓農家用資研究焉。

六九 喉簧

許州有一老僧。自四十已後。每寐熟。卽喉中如鼓簧。若成韻節。許州伶人嘗伺其寢。卽譜其聲。按之。此與腹中音樂頗相類也。

七十 消食龍

江夏郡安陸縣隆安中。有郭坦兄弟三人。大兄得天行病。後遂長大能食。一日食斗米。旋家給不足。至於乞食。或日詣一家。前門已得飯。復乞其後門。其家人怒之云。前門已飯了。又從後門來討。那得許多與你。彼答云。腹中饑甚。實不知是後門。適門內園有薤三畦。彼就地啗其二。須

與悶臥在地。大吐一物如龍。因出。漸漸小。人持飯與。遂不復食。將飯著所吐之物上。卽消化成水。此病尋瘥。

### 七一 枯草熱

美國一植物家。夏日。自田間採集諸草本植物歸。道經牧場。未食頃。自覺鼻中辛辣異常。連連噴嚏不止。無何。鼻塞聲重。涕泗滂沱。兩眼紅腫。涕汁味鹹。前額痛甚。微有寒熱。兩日後。噓噏殊艱。喉間嘗咿軋作聲。更有一種極高之笛聲隨之。與尋常氣喘相似。美國醫生不知此病。適法國森那醫博士遊歷至彼。丐診斷之。謂是枯草熱。當穀草開花之期。此病極盛。吸此花粉。卽罹同病。雖不致死。頗難瘥也。

### ✓ 七十二 腹中蛙

汾州王氏。病右脅有聲如蛙。常欲手按之。否則聲聲相接。醫不能辨。留陽山人趙巒診之。曰。此因驚氣入於臟腑而成。與鎮驚硃砂丸。以蝦蟆衣湯送下。遂瘥。蝦蟆衣。卽車前草也。



七三 頭中珠

洪州北界大王埠胡氏子。最小者氣狀殊偉。胡本家貧。此子既生。家稍充給。農桑營贍。力漸豐足。此子舡所抵處。岸中得錢。馬所跑處。又獲多金。由是其家益富。市置僕馬。營飾服裝。他日復詣城市。因有胡商遇之。知其頭中有珠。使人誘之。以其狎熟。飲之以酒。取其珠而去。初額上有肉。隱起如半毬子形。失珠之後。其肉遂陷。既還家。親友眷屬。咸共嗟訝。自是此子精神減耗。成疾而卒。其家生計亦漸亡落焉。

七四 馬蹠足

邕州北門外永壽寺僧法悟。自幼披剃。願體素羸弱。甫成年。兩下肢自足踝以下。一旦變其常態。肌肉削蝕。似瘰非瘰。按之疼甚。搔之不覺。且絲毫無力。自是足遂不能著地。頻年在繩牀上營生活矣。既病愈劇。上犯而至膝蓋。兩足向內翻。峻削若馬蹠。偶起牀。必需一人掖持之。欲如廁。則背負之。名醫一二輩。舉莫曉其名。而教會西醫。亦以不治對。淹滯



第一圖  
僧人之馬蹏足





第 二 圖  
金 魚 眼



第 三 圖  
印 婦 之 背 上 數 字

第 四 圖  
骨 化 肉




第五圖 手足異



第 六 圖




歪嘴之婦人



歪嘴之侍兒

第 七 圖 接 生 手



第 八 圖

大 頭 兒



牀褥。荏苒八年。鄉曲無知。遂以前生冤孽。妄擬議焉。

七五 金魚眼

意大利人約瑟若納。兩眼皆突眶而出。酷似金魚眼。上下眼瞼。至不能合。故雖睡眠中。亦作厲鬼睜目狀。見者莫不駭走。睛珠既失其保障之物。動卽乾燥。且煙塵飛至。目不能瞬。淚亦勿及。受害既久。白睛遂日漸蝕壞。嘗乞醫診治。醫云是 Basedow'sche Krankheit Morbus 病之一種證候。如果聽之。終必變成睛癆。若納懇切求此醫療之。尙未知奏效若何。

七六 接客病

蔡魯公喜接賓客。終日酬酢不倦。家居。遇賓客少閒。則必至子弟學舍。與其門客從容燕笑。蔡元度稟氣弱。畏見賓客。每不得已再見。則以啜茶多。退必嘔吐。嘗云。家兄一日無客則病。某一日接客則病。此其所以爲大人先生歟。

七七 石瘕

昔有一婦。產後因子死。經斷不行半年。一日小腹忽痛。陰戶內有物如石硬。塞之而痛不禁。羣醫不識。青林曰。此石瘕也。用四物湯加桃仁、大黃、三稜、檳榔、延胡索、附子、澤瀉、血竭爲湯。二劑而愈。

七八 男子孕

一梨園子弟。腹漸果。時時轉動。宛似懷孕。一日正演劇間。腹痛甚。下一胞。中有肉。長三四寸。略具人形。此人卒以痛楚死。齊門白甸寺有僧病痞疾死。僧少齒。美姿容。忽爆一聲腹裂。中有一胞。胞內一小兒。長數寸。面目眉髮皆具。又閭門一男子生子死。街卒以聞於郡守徐公。公顧謂門子曰。爾輩慎之。理之所必無。事之所竟有。異哉。

七九 洪水熱

明治九年夏五月。日本新瀉縣境猝遭水患。閱八日。水始退。六月。魚沼川沿岸某村。遂發見未有之新流行病。患此者大半村農。刺船往來者。亦間罹一二。先是該村生一種小蟲。色紅黃。有六足。形長圓如蝨。咸呼

之曰毛蟲。每鄉人耕作時。輒來螫人。四五日後。卽體倦頭重。不思飲食。又二三日。寒戰壯熱。前額及兩太陽穴。非常疼痛。且覺跳動。無何。乳房陰囊諸部。發生膿泡。大似天花。旣乃潰爛。面結黑靨。去其靨視之。則有一深窩。周緣無血。軟而現青紫色。附近水脈腺。俱腫大如胡桃。按之則痛。重症。百人中死者可四十人。老幼患此。必不救。聞當時傳染頗盛云。

### 八十 皮異

吳門易冰如。喜食蟹。當鞠華黃時。輒柬友會食白蒲蟹。顧每食未終。已遍體生蕁麻疹。周紅中青蒼。邊廓微隆起。任之則如錢。搔之則成條。大小長短殊不一。奇癢欲死。約半日。始消滅。然其嗜蟹如故也。曾見上海一印度婦人。以夏日沐罷。適其夫外歸。戲以爪甲畫 I 8 9 4 及 H W 數字。婦背上。不意作字處。迅卽暴腫。色紅似硃。久而不散。亦頗煩癢。後此該處皮膚。每受激刺。字迹仍顯。雖岳武穆盡忠報國四字。不啻也。

### 八一 妬癡



唐李益少有癡病。而多猜忌。防閑妻妾。過爲苛酷。至有散灰扃戶之譚。故時謂妬癡爲李益疾。吾鄉某士人。亦有是病。士人家城南。兄弟二人同居。各有妻室子女。家道雖不裕。頗怡怡如也。士人自得病。值弟客中。還便疑其有陳平事。夜寢。門必加鍵。防其弟潛入焉。旣更形之於口。弟不堪受誣。遂涕泣徙去。以是知古今人有同病也。

八二 足脛流髓

越人某甲。兩足心凸起如腫。上面生黑色豆瘡。硬如鐵釘。著地不得。脛骨有孔。骨髓流出。身發寒顫。惟思飲酒。此是肝腎氣冷熱相吞。用炮川烏頭末傅之。煎韭子湯服。遂效。

八三 反嚼症

揚州木工顧鼎元。平生有一異症。飲啖至迅速。有狼吞虎嚥之概。然頃必還入口中。再經咀嚼。乃仍下咽。如是數年。習以爲常。考動物中惟芻食獸之牛。其胃有四。故能起反嚼作用。人之胃囊一而已矣。而竟如牛。



殆惡習使然歟。

八四 肉化骨

有清中興。湘軍老兵胡煥文子世光。年十八矣。嘗夜冒雨行。因得寒疾。世光固無能。日惟以力役爲生。既得疾。仍強勉荷重。無何。脊背間膚色陡紅。撫之灼熱。捫之痛楚。按之浮腫。以其爲風也。漫然施表藥。半月後。熱止紅退。痛定消腫。而患部肌肉。又變作爛泥狀。運動維艱。由是遂不復能負擔。久之。此狀如爛泥之肌肉。徐徐化成軟骨。磊磊不平。又久之。竟成骨質。與固有之骨粘合作爲一。或平如板。或微凸若鋸齒。雖絲毫不能動作矣。

八五 手足異

曩年隨侍家大人官嶺西。道經蒼梧。泊舟西門外。予姊適憑窗閒眺。忽呼余曰。弟速來觀岸上怪人。趨視。則見一男子坐莊門前。年事可二十來。頻舉其兩手兩足。作蝴蝶舞。雖不迅速。而有多種姿勢。亦頗訝之。因

令篙工就詢究竟。云實是怪病。且不由自主。姊好奇勝於予。出所攜快鏡。登陸攝之。像成。畀予一枚。再三諦視。殊饒興味。無以名之。姑名之曰手足異。

八六 吐糞病

日本大阪井櫻子。陶人飯塚龜吉婦也。于歸後。舉一子。其明年。時來便祕症。不甚厝意也。或日。體忽發熱。噯氣膨脹。腹痛欲死。俄而哇出糞塊。奇臭不堪。家人咸驚異之。旋經醫士治愈。以不善攝生故。愈亦復發現。已入某病院。言須實行手術云。

八七 虱蠱

一人臨臥。忽遍體生虱。多至四五升。繼而每宿漸多。癢痛不可言狀。馴至血肉俱壞。晝夜臥牀號哭。舌尖出血不止。身齒俱黑。唇動鼻張。連飲鹽酢湯十數碗。漸安。

八八 巨人

俄人馬喜。年二十二。身長八英尺。其右手食指。帶一戒指。中堪容半元之銀幣。所著長靴。才及膝。他人穿之。則沒腰。十二三歲之童子。竟可潛身其中。某學者見之。訝其魁梧。已挈往莫斯科。各國學會。均派人來觀。爭欲研究其發育機關。法國最聞名之人類學者盧湘曰。是誠巨人中之巨人。

八九 無陰門

吾鄉秦翁。由平湖縣尉解職還山。嘗納一妾。折簡招諸親友宴其家。自後街坊間。不見秦翁踪跡者幾浹旬。羣疑此老乍得新寵。殆敝屣人間一切事矣。亦有料其攫疾者。又數日。始見翁於茶肆中。衆遂集問焉。翁拈髭微笑曰。否否。茲事非徒諸君所不料。卽老朽亦不料。隨以指蘸茶書無陰門三字於桌上。衆曰。若然。溺自何出耶。曰。固有一孔也。曰。叟將何以處此。曰。幸有星伯在。業用人工法。闢得一門矣。星伯。姓鄧。邑外科醫也。

九十 筋解

有人四肢骨節。並皆解脫。但有皮連。不能舉動。名曰筋解。用酒浸黃蘆三兩。經一宿。取出。焙乾爲末。每服二錢。酒調下。服盡安。

九一 歪嘴

表兄蔣靜庵語予云。同寮襄陽金雲倬明府家。一侍兒。年十八。字五羊城。外鍾木匠。取有日矣。嘴忽無故歪。縮唇牽鼻。狀殊醜陋。主僕輩咸謂是被鬼風所吹。此等譏言。詎不可哂。語次。輒以照片授予。曰。以吾弟好奇。故爲丐得也。又富水姚紳妻潘氏。亦是歪嘴。予親見之。醜惡尤甚於金家婢。試以兩者相較。金婢歪而骨峻嶒。姚婦歪而肉擁腫。非關肥瘠。病不同也。爰併誌之。

九二 髭兒

清宗室納蘭侍衛甯秀。太傅明珠曾孫也。生而垂髭數十莖。羅羅頤下。年弱冠。貌已蒼老。如四五十歲人。未三十卽下世。家因之日替。亦一異

也。

### 九三 接生手

土耳其靴匠名撒佛納者。以善製靴稱。卒由是致廢。年猶在三十內也。所患之症。至爲奇異。病以眩暈頭痛。皮膚異覺開始。繼而兩手相對拘攣。宛似穩婆當接生時所作之手勢。且牽及肘部。不能毫末移動。毘陵某君。亦有是病。惟祇一手。又不似此之板滯耳。

### 九四 大頭孩

己酉孟夏。旅滬西商春季跑馬。泥城橋西。故有隙地一區。販脂賣漿之流。咸集而博蠅頭焉。予居臨街。憑窗俯瞰。正對此半年三日之墟。忽見布篷下。坐中年婦。懷中擁一大頭孩。默計約在一歲外。其頭之巨。長廣於面部二倍半。現一種癡鈍之貌。時沐陽廖生適在側。瞿然曰。此兒頭大如此。其腦髓富有可知。其智謀出衆又可知。予曰。否。是水也。非腦也。觀其癡鈍。卽可知矣。曰。何謂水。曰。水腫耳。是名水頭症。此其尤大者。

九五 前陰出糞

陽朔民子婦。小便中出大糞。一醫教服五苓散。當效。如未盡愈。改用舊  
幘頭燒灰酒服。婦如言服之。果效。惜未能舉其名耳。

九六 毛孔血

一人毛竅節次血出。若血不出。皮卽膨脹如鼓。須臾。眼鼻口俱脹。有老  
醫言是脈溢。但飲生薑汁合水各一二盞。卽止。此人不知是否試服。

九七 洞胸

西林一少婦。胸潰一洞。中有膿血。與口中所欬相應而出。久而不愈。偶  
以參芪當歸。加退熱排膿等藥。試服而瘥。而所出膿血。已不少矣。且無  
能識其病。

九八 墮指病

齊魯間一男子。十指節俱痛。不可忍。漸至斷落。瘍醫某。以蓖麻子去殼  
二兩。碎者不用。黃連四兩。貯瓶內。水二升。浸之。春夏三日。秋冬五日。令

患人每早向東。取此水吞下。蓖麻子一粒。漸加至四五粒。微泄無害。忌食動風物。殊驗。

九九 茶病

溧陽許秉彜。上舍妻郭婉如。產後日飲茶二十餘椀。一月後。遍身有冰冷處數塊。人以指按其冷處。卽從指下上應至心。如是者二年。諸醫不效。會新陽趙元益。應徵至彼。上舍聞而延視之。元益效法古人。以八物湯去地黃。加橘紅。入薑汁。竹瀝一酒杯。十服而卻冷生溫。亦一異也。

一百 喉臭

一人咽喉間生肉。層層相疊。漸漸腫起。不痛。多日乃成窾。腥臭從窾中出。令人作三日惡。患人自亦厭惡之。歷年餘。猶不治。已絕望矣。忽一道人踵門見。具言能治狀。從之。道人令退飲食。用臭橘葉煎湯連服。果愈。

百一 人生角

漢景帝九年二月。膠東下密人。年七十餘。生角。角有毛。但不詳生何許。



五代時。孫謙末年。頭生二肉角。各長一寸。南美智利土人某甲。額中央生一角。長七寸。向前挺出。復向下彎。儼似羊角也。人戲扳其角。輒大號。問何故。言是角旁肉痛耳。蓋角爲皮革所化。其內層之肌膜。固無恙也。譬如胼胝。以剛抵柔。惡得不痛耶。

百二 兒死復活

山陽方與女田無齋生子。先未生二日。兒嘔腹中。及生。不舉。葬之陌上。三日。人過聞嘔聲。母掘而收養之。未生而已嘔。一異也。既葬而仍嘔。二異也。豈視桐棺三寸。若母腹之子宮歟。此誠理之不可解者。

百三 嚮言

吳孫休世。烏程民有得困疾。及瘥。能以嚮言者。言於此。而聞於彼。自其所聽之。不覺其聲之大也。自遠聽之。如人對言。不覺聲之自遠來也。聲之所往。隨其所向。遠者不過十數里。其鄰人有責息。歷年不還。乃假之。使爲責讓。懼以禍福。負物者以爲鬼神。卽傾倒畀之。其人亦不自知所



以然也。

百四 老婦化龍

漢靈帝時。江夏黃氏之母。浴而化爲龍。入於深淵。其後時出見。初浴簪一銀釵。及見。猶在其首。考古史。如童化鳥。客化鶴。兒化龍。吏化虎。類此者正多。黃母特其一耳。

百五 三縛

周伊婁穆以疾還京。僧垣省疾。乃云。自腰至臍。似有三縛。兩脚緩縱。不復自持。僧垣爲診脈。處湯三劑。穆初服一劑。上縛卽解。次服一劑。中縛復解。又服一劑。三縛悉除。惟兩脚疼痺。猶自孿弱。更爲合散一劑。稍得屈伸。僧垣曰。終待霜降。此患當愈。及至九月。遂能起行。

百六 入地不死

晉干寶父先有所寵侍婢。其母甚妬忌。及父亡。母乃生推婢於墓中。寶兄弟年小。不之審也。後十餘年。母喪開幕。而婢伏棺如生。載還。經日。乃

蘇言其父嘗取飲食與之。恩情如生。在家中吉凶。輒語之。考校悉驗。地中亦不覺爲惡。旣而嫁之生子。又杜錫家葬而婢誤不得出。後十餘年。開冢附葬。而婢尙生。其始如暝。有頃漸覺。問之。自謂嘗一再宿耳。初婢之埋。年十五六。及開冢更生。猶十五六也。嫁之。亦有子。

百七 男化女

漢哀帝建平中。豫章男子化爲女子。嫁爲人婦。生一子。長安陳鳳言。此陽變爲陰。將亡繼嗣。自相生之象。一曰男化爲女。宮刑濫也。清道光初。建安某村農民姚二。年十九。已與未婚妻私通。且有娠矣。一夜臥後。忽自覺私處癢且痛。搔之不可。抑之不得。詰旦視之。陽物根處周圍焮衝。如粟泡。無何。延入莖底。幸泡破。隨結黑痂。無膿血也。五日後。陰莖墮。病且內陷。及瘡。竟成一竅。外狀且酷似女陰。妻兄某乙。聞而異之。試與之媾。果亦孕。乃任其妻免身後。改適他氏。己則從某乙以終。此豈以清宮闈豎之過濫歟。抑亦如陳鳳言也。

百八 肝脹

父言。幼避洪楊亂。輾轉至宿遷。寇猝至。掠以去。使司炊。幸不爲惡。數日。隨行抵一鎮。云是固山。始知又被挾而南下矣。軍中有統帶名黃黑虎者。殺人最多。所過輒手刃婦孺數十以爲樂。尤喜食人肝。謂味過太牢。婦孺者最佳。每夕需此侑酒焉。一日醉臥如泥。忽一逸馬直衝榻前。觸而醒。右脅下頓覺脹硬。入夜飲酒食肝如故。甫及半。自覺患處脹硬益甚。探手捫之。堅似石。高如鼓。又頃。腹竟裂。有物奪而出。作瑪瑙色。歧瓣若蓮花。大擬菜碗。高可二寸許。召醫視之。醫懼禱。給之曰。此聖蓮也。至有神勇。退而語吾父曰。吾醫人多矣。未見有此者。是肝脹也。十日必死。其人肝之報歟。如期果摧殘死。然彌留際。猶啖人肝三枚云。

百九 脂夜

在人腹中肥而包裹心者。脂也。心區瞽則冥晦。故有脂夜之妖。一曰有脂物而夜爲妖。若脂水夜污人衣。淫之象也。一曰夜妖者。雲風並起而

杳冥。故與常風同象也。

百十 足寫大字

新寧紫封太守。予通家也。言嘗奉差至鎮南關。輿中遙見一人。屈一足作鶴立。既近。方知屈一足者。乃首兩趾間挾一敝帚。蘸煤作巨字地上耳。且書且躍。頃刻便完一字。大可似吳中牆上當字。筆勢亦頗遒勁。問何以能此。對曰。他無所能。僅恃此。故頗精習之。視其足了無異人處。但首兩趾倍長。且距離寬廣。其能挾帚柄以此。

百一一 巨囊

予前寓桂林。終日無所事。輒喜探奇以爲樂。一日。偕二兄同赴皇城。道經水東門。遙見一人著無襠褲。蹣跚而來。若不勝其憊者。俄踞坐人家門前石階上。喘鳴如牛。予因問何所苦。此人隨揭褲。眎予曰。腎囊墜重如此。焉有不困苦者。視之。果大似栲栳。立時可垂至膝下。離地殆不盈尺。兩腿且開張不能闔。而陰莖則幾不見。囊間有蝕痕頗多。詢知是溺

所浸淫而然。無何仍蹣跚去。

百一二 二形人

二形人。俗所謂公母人也。大般若經載五種黃門。梵言扇搥半釋迦。唐言黃門。其類有五。其四曰博義半釋迦。謂半月成男。半月成女。造像經云。有五種不男。曰生、堅、如、變、半。半者二形。乃人中惡趣也。晉五行志謂之人疴。褚氏遺書。非男非女之身。精血散分。感以婦人。則男。感以男子。則女。感以天地不正之氣也。番禺某民婦生一兒。上半月顯然女陰。下半月顯然男陰。其卽所謂二形人歟。

百一三 白兒

白兒。生而全身皆白。目不黑而微赤。最畏光。視力弱。然昏夜微明。視察轉顯。吳人稱爲白小囡。閩人呼曰天老兒。世界中惟美洲巴拿馬土腰地方。白兒最多。顧土人每視爲妖孽。往往屏逐之。久之。若輩遂嘯其黨侶。於山野中自營其生活焉。往昔西人多疑其別一種族。今乃知其非

是。

百一四 塌鼻夜叉

耶薄人貌極獐惡。酷似夜叉。見之令人作三日惡。口大如箕。鼻塌如砥。眼角向上。半啓半合。面黑如漆。唇紅若硃。自腰至膝。圍粗布一方。穢黑腥膩。兩足盡赤。皮厚而堅。儼似鞋底。呼人曰烏牙牙。驟見之。真無異怪物焉。

百一五 色魔

金幹離不子尙敷阜。能飲酒五斗餘。啖肉五六十襜。然每醉必御婦人。自夜至曉。未嘗少歇。婦人不堪其苦。東京珠子舖王員外家女。年十九。嫁與質舖周家爲媳。金人至。全家被屠。繫女見粘竿。卽賜與阜。阜醉而淫之焉。尋此女又爲阿計替所得。乃述其梗概如此。

百一六 蟆子

蟆子。蚊蟲之屬。元微之蟆子詩序云。黑而小。不礙紗縠。晝伏夜飛。嚙人

成瘡。秋夏不愈。膏楸葉傳之則瘥。聞柏煙麝香卽去。此二物皆蜀地之  
最可憎者。

百一七 眉聽

田少司寇漪亭巡撫貴州時。有一孝廉黃姓名之驂。耳不能聽。以眉聽。  
古謂龍以角聽。牛以鼻聽。每以爲荒誕不經。乃竟有類於此者。誠所謂  
天下之大。無奇不有矣。

百一八 中異物毒

綠益子。出壽州。木高丈餘。葉兩兩相對。有花如蓋。大黃色。有實亦相對。  
大如木瓜。綠色。以手觸之。已成熟。宋少帝流徙至此。隨行中有莫利列  
者。取而食之。方入口微嚼。齒落如屑。舌黑如漆。急吐之。滿口破裂。血如  
泉湧。終日不能食。後經旬乃已。土人云。是能碎骨如泥。惜未知其果含  
何種毒質。中毒者亦不知有無解法耳。

百一九 不洩病



粵西永淳縣上百一十里砧板塘之南岸。有留人石。高低形狀不一。悉肖婦人形。石前二丈許。有澗一條橫其前。自南迤北。澗口臨江處。一巨石蔽之。高與岸等。中通一縫。酷似女人之私。澗水自縫中出而入於江。則名之曰留人洞。人或塞其洞口。則闔村婦女。皆腹漲而不能洩。故於澗水出處設巡視之所。村民輪流守望。夫一村婦女之洩不洩。繫於一洞之通與塞。迷信歟。抑實有關係歟。皆未可知也。

百二十 食人癖

澳洲東岸法領南洋羣島中。有食人國。一教士新從彼中來。言該地之人。自來有食人癖。人爲所擒。殺之。割作小塊。包以木葉。掘地成坎。鋪石燒之。上覆泥土。兩三時後。香氣上騰。知已熟。取出去其土。肉中有白脂溢出。作牛乳色。乃爭啖之。謂味之甘美。無可與匹者。平日概食同種人之肉。若能弋得白人。則雀躍彌甚。必吹大號。擊大鼓。如慶大典。聚族而後食。以其味尤美也。



百二一 禿頂

德人某。遊歷至美國之華盛頓。一日。偕友人閒步公園。園有古樹一株。老榦參天。濃陰蔽日。時驕陽可畏。因趨古樹下憩焉。忽一葉墮地。某拾取視之。適頭頂微癢。某將此樹滿頭摩之。其意不過以葉代指爪之勞。其友在旁。亦不虞也。詎知薄暮還家。嚮之鬢鬢者。頃已濯濯矣。尤奇者。後此且永不復生。治療之。亦無效。逆旅主人聞而語之曰。若嘗遊公園。憩大樹下。取樹葉摩頂乎。曰。然。曰。此剃頭樹也。葉觸髮。髮立墮。且不復生。子病是矣。奚治爲。

百二二 催眠成瘖

日本東京某打球場之僕某甲。曾受某醫生之催眠術。歸卽熟寐。歷一晝夜方覺。自後舉動遲鈍。意志沈默。且出言無聲。幾若病瘖。獨擊球之技大進。殆無與賽賭者。彼中醫家。詫爲奇聞。咸謂與催眠術不無關係云。

百二三 蠱毒

沅江土司。世傳蠱法。其藥最毒而最奇。凡郡守新任。例必設宴迎風。而藥已入腹矣。在任理事。藥不即發也。但兩目瞳子。變黑而爲藍。面色淡黃。狀類浮腫。至離任十月。則閤門并命矣。又滇俗重財而好養女。女長則以歸寄客之流落者。然貌醜而才下。慮賦谷風。則密以此藥投之。自能變蕩子之耳目。視嫖母如西子。福建之古田。長溪亦然。其蠱種有四。一曰已蠱。二曰金蠱。三曰蜈蚣蠱。四曰蝦蟇蠱。皆極毒者。

百二四 肥人

英國飛黎賽總督報稱新民佗那島山中。新發見一種肥人。身長纔三尺。腰圍乃廣至三尺餘。生啖鳥獸。不知火食。尤奇者。體量雖極笨重。而步履如飛。頃得一少女。年甫十三歲。已重百七十四斤。業送至紐約供衆覽矣。

百二五 中鳥喙毒

朱晦翁中鳥喙毒。頭岑岑。漸煩憊。徧體皆黑。幾至危殆。山中又無醫藥。因思漢質帝得水可活之言。汲新水。連飲之。大嘔而解。此則學問賅博之力也。

百二六 縮陽

南州有軍士若干。涉一水。皆病陰痿。不知何故。召士著詢之。曰。諸公會否。涉一水乎。皆曰然。曰。此水乃蚺蛇出沒處。有涎沫遺其中。著男陰。卽消縮不已。脂著陰亦然。羣不信。衆中有黠者。曰。是不難。可立驗之。隨覓一牡狗來。縛而投之水。但不令死。有頃。取出視之。狗陰果亦消縮。衆方信。然卒無療法也。

百二七 水淫

宋蒲傳正爲資政。有大洗面。小洗面。大濯足。小濯足。大澡浴。諸例。小洗面。一易湯。用二人。頰面而已。大洗面。三易湯。用五人。肩頸及焉。小濯足。一易湯。用二人。踵踝而已。大濯足。三易湯。用四人。膝股及焉。小澡浴。湯

用三斛。人用五六。大澡浴。湯用五斛。人用八九。每日兩洗面。兩濯足。間日一小浴。又間日一大浴。其口脂面藥。薰爐妙香。未嘗斯須去側也。與何侈之一日洗浴十餘遍。同其水淫。今婆羅門人日必澡浴一次。若指端偶觸及污處。入浴如前。尤喜漱口。晨起無論矣。乃至食終漱十二次。洩餘四次。便後八次。甚者見人便旋。聞人穢語。亦必漱口。謂爲水淫。亦無不可。

百二八 竊食癖

日相伊藤博文。幼時嘗爲木戶公食客。每窺廚中無人。輒入而竊食。習以爲常。及後位極人臣。故態依然。每日退朝歸邸。仍必潛至廚下。搜尋食櫥一過。奇癖也。

百二九 黃瘧

南美古巴等熱帶地方。有一種特異之流行病。名曰黃瘧。亦稱熱地傷寒。患此死者。不知凡幾。惟土著犯者略少。病發先覺頭疼欲裂。俄而寒

戰壯熱相繼而至。喉渴甚。腹痛大哇。所哇物黑且穢。於是肌膚發黃。少四日。多八日。即便物化。按古巴正當赤道下。毒蚊最多。吮人之血。螫人以毒。遂致發病。於以知露筋之說。信有自也。

### 百三十 書中毒

美國有富家女曰羅夫人。或日。郵來一簡。不署姓名。發緘視之。略謂此函內有二百萬惡病蟲。當啓封時。閱者必中其毒。不速治。死無疑。余乃善治蟲者。但必予多金。始售吾術云云。夫人讀信方終。果昏暈倒地。經數小時。乃微醒覺。因即將此信遠致化學家考驗。確含有病蟲之惡質。讀之便能中人。人心之險。一至於此。可危也。

### 百三一 大食

范路公授荆鎮左營遊擊。一日清晨。邀食蒸羊。羊約四十餘斤。以兩大銅盤盛之。又芝蔴火燒。每盤四五十。列兩席。路公及中軍守備楊貴並三客皆與焉。楊善食。主人命獨坐下席。上席一主三客。啖肉未及十之

一二。火燒每人纔三四枚。而楊中軍獨坐之羊肉火燒盡矣。主人云。我們且待喫飯。上席羊肉火燒。并送楊掌家。掌家營中之稱中軍也。卽撤與。又立盡。頃之上飯。餚饌頗豐。下席亦然。楊啖食無餘。客因問楊掌家食若何。楊云。每餐三觔肉。三觔麵。三升米。五觔豆腐。更佐以葱韭數觔。一日兩餐而已。楊之身材中下。不知何處容受。亦不知如何消化。奇極。

百三二 羊鳴

澄江西鄉錢秉三。田舍翁也。年五十。始得一子。愛之逾拱璧。錢家貧固饒。恆畜羊百十頭。孳生獲利焉。子襁褓中習與牧羊兒戲。咩咩之聲。所素聞也。五歲時。一旦匍匐學羊鳴。羣以其戲也。置之。不意弄假成真。啼亦羊鳴。笑亦羊鳴。欲食亦羊鳴。欲眠亦羊鳴。累月而不效。醫至曰。疾不可爲也。非癩非風。其冤孽乎。

百三三 鎖肛

某甲婦舉一女。有前陰而無後陰。胎糞自前陰出。延醫診之。醫曰。此鎖

肛也。問可治乎。曰。天生缺陷。逆天不祥。且此兒死在五日内。奚治爲。及期。果驗。一昨應診四明。寓邑廟旁。鄰家兒嬉戲門外。保姆提攜之。兒瞥見予。如舊相識。頻趨予側。因摩其頂曰。兒年幾何矣。保姆代答云。七歲矣。小時患鎖肛。故薄弱殊甚耳。問鎖肛今何如。答云。幸某院名醫爲造一肛門。不浹旬已治愈。其父母至今猶食其德也。同一鎖肛也。於西醫則治。於中醫則不治。於以見外科手術之有高下。

百三四 氣癭

齊魯間一婦人。年可四十許。頸項間生氣癭。百治不效。既且愈大。下垂如牛胡。嘗語人云。世人不幸。莫如女子。女子不幸。尤莫如余。人問何故。則指頸間曰。此吾夫所賜也。渠性暴戾。二十年來。呵叱鞭笞無已日。氣結莫伸。故有此耳。語次。淚簌簌下。聞者憐之。

百三五 嫌疑癖

予戚蔣君云。祖母程氏。錫山程慕韓先生次女也。幼秉庭訓。長嫻坤儀。



十九歸余祖。一言一行。悉兢兢以禮法自持。祖母體素健。罕遭疾。僅五十九歲時。偶染河魚之疾。余父召醫診視。醫來欲脈之。不可再三請。佛然曰。男女授受。猶且不親。余腕豈汝所能觸耶。醫不得已。漫焉制方而去。然病卒以不起。傷哉。予謂此是嫌疑之癖。有以害之。拘小節而亡厥身。君子不爲也。

百三六 二十四節氣病

諺云。常病之人。交節氣。病必劇。此不過指二至二分大節氣言耳。從無逢節輒病者。有之惟甬人孫某之婦。婦年二十六。嚮患肝風。逢節必發。發則如厥。一年二十四番。歷試不爽。因詢治法於予。予曰。凡神經質之人。其天人相感之程度必甚高。若妻卽是也。欲治其根。惟有家中不置曆本。俾不知某日交某節。病自無由而發。或每逢節氣。挈之出外玩遊。則庶有豸乎。

百三七 尸蟲



一民子患癩瘡。垂死。遍體出蟲。迨氣絕。蟲且緣牀榻几椅。家人俱莫敢逼視。出錢僱丐者二人。爲之殮斂。並集尸蟲焚之。奇臭不堪名狀。櫬固浮厝郊外。父老皆言。恐不利於人。命速瘞諸義塚以絕後患。後此兩丐者歸卽大病。一病臥二月愈。一竟死。此六年前事。疫症歟。戾氣歟。皆不可知也。

百三八 打病

門子羅福。醴陵人。在署中時。吾父令司灑掃等雜役者也。人尙誠懇。中年後。兩股生一種皮疹。奇癢難忍。或搔之。或洗之。皆如故。必打之。乃稍殺。裸而撻之。尤佳。故每日飯後及寢前。必伏牀上。令妻持薄竹版撻之。已則握籌算計焉。至二百。則呼止。其妻嘗語同輩云。依此打到老死。尙不知有幾千萬下也。問被撲處紅腫否。則云。打時微有紅腫。不食頃。如舊矣。問盍用藥治之。曰。實曾治之。以無效。遂出此下策耳。

百三九 香汗

廣州兒醫黎荔生。因赴友家飲。席上告予云。僕十七歲時。夏月偶出外。歸而汗流浹背。則香氣馥郁。非檀非麝。心自異之。由是累日皆然。顧別無他患也。冬日無汗。則呼氣變香。如是者二年餘。年二十。授室後。卽不復有此。時猶未習岐黃也。然及今思之。仍莫得其理解。謂非奇病而何。予曰。然。他日或爲君傳之。

百四十 膝端佛

維楊一漁父。賣魚得錢。則沽酒獨酌。旣醉。倚篷一覺。晏如也。晚年。左膝蓋骨下正中前面。忽變常態。當屈膝時。硬骨隆起頗高。諦視之一佛也。合十趺坐。眉目如畫。大可徑寸。觸之不覺痛楚。行時亦無異常。遂聽之。鄰里聞之。咸謂漁父不事殺生之報。然而奇矣。

百四一 葡萄胎

東隣徐姓婦。有一子。已四齡。自春間始。月事乃不至。咸謂夫人又夢蘭矣。詎五閱月而半產。視所產物。肉球纍纍若葡萄。殆不成爲胎也。家人

遂以鬼胎目之。一日其夫來訪予。問是何病。予謂此名葡萄胎。病起於子宮內之絨毛膜。似胎而實非胎。乃婦人稀有之病也。

#### 百四二 肉峯

南京下關逆旅主人范姓。浙之上虞人也。體魁梧。健飲啖。中年後。背脊正中肉忽隆起。由微而著。半年而已高五寸許。宛似橐駝之單峯。隆起處與其周圍。不紅腫。亦無痛楚。僅仰臥時略不適耳。今此人已老矣。而挺生之肉峯。迄未少減。人生疾病。詭奇如此。

#### 百四三 拒男

同學長沙李達人。娶辰州于氏女。性婉順。顧不解人道。每寢必獨裏一氈。嚴拒交媾。達人雖婉轉求之。弗顧也。欲醉而淫之。恨終不得間。因走詢于母。有無隱疾。則力白其無。同牀各夢。荏苒四年。舅姑屢擬切責之。則以其奉事維謹。故欲言又止。不得已。別爲達人納一簋室。女以獲免乎體交也。益喜形於色。達人告我如此。其俗所謂觀音身歟。

百四四 胃中寶物

法國人。軼其名。以胃病入某病院受治。醫漫投以藥劑。十日餘。無起色。易一院治之。醫士爲行觸診。覺堅硬峻嶒之物。纍纍滿腹腔也。異而照以X光。果不謬。乃先期召集他院專家。實行剖腹術焉。及期破胃。取出礦物類至夥。計鵝卵大礫石五枚。鳩卵大礫石二十一枚。重七錢。猩紅寶石一顆。猫眼大東珠五顆。一寸長鏽鐵釘百七十三枚。二寸長螺絲釘三十三枚。開瓶塞楔子一個。玻璃瓶塞大小五個。碎玻璃重三兩七錢四釐。爛鐵大小十八片。鋼筆頭十九個。胃囊內面。處處潰瘍。完好處又變肥厚。爲施種種之治法。幸獲告痊。兩月餘。命退院。愈後。示以剖得諸物。但云是歷年所食。詢珠寶何來。則堅不肯言。院中醫士。遂據以報告各國云。

百四五 諸竅流血

辛亥秋八月。甬人有爲其所眷蘇妓金紅蘭來問病者。訪予於醫院云。

此妓年二十七。來甬甫四月。已蜚聲北里。上月杪。忽小產。惡露由是不斷。乃未幾而便溺皆血。未幾而口鼻出血。未幾而眼耳流血。今且毛竅中亦隱有溢血之勢矣。敢問是何病症。有無治法。予曰。君所言信否。且其他現狀若何。答言。無一字不確實。病者除諸竅流血外。飲食減少。精神不振。體力微弱。如是而已。中醫但云是血變。而難決其生死。用是質諸先生。予謂症既複雜。若此。雖施種種診察。猶難立下斷語。惡有不見其人。而即能定其病者。子休矣。

#### 百四六 掌上天文

歐洲蒲加利亞國。有修理鐘表者。名約翰撒司佛萊。左手掌有細黑子無數。大者如麻實。小者若芥子。硬而微凸隆。約翰以其無甚障礙。遂亦安之。一日。某天文學家詣約翰所。出閏表令修理之。約翰左手接表。右手旋動指針。掌外露黑子。適爲所見。此人細視良久。忽作詫異聲曰。異哉。星辰乃在掌上。約翰方審察表中之機件。聞此人言。遂置表起問曰。

先生云何。曰。君掌上有天文。知未。約翰伸左掌云。先生是言此黑子否。曰。然。約翰搖首。示不信意。此人乃探懷。出一精美之天文圖。對照之。則若者爲恆星。若者爲行星。歷歷不爽。始恍然悟。自是約翰左手嘗匿不示人。蓋視此縮版之天文圖。若卞玉和璧矣。

百四七 侏儒

中州一矮人。依其戚居海上。一日過予廬。適見之。身長二尺許。短在下支。長不滿一尺。頗疑其腿骨祇有一節。及細察行動。則又不然。身圍之小。與其短適相稱。然而殊蒼老。髮亦有頰白者。問其年。已四十五矣。有子一。謂不如己之短小。昔晏子長不滿三尺。時人異之。今觀此人。乃知世間更有短小之侏儒也。

百四八 腹語

日本醫學雜誌云。岐阜縣人菊愛孃。自幼腹中卽能出聲作語。有時其父母呼之。口未答而腹已騰。有時家人聚談。唇未動而腹已言。且應對



如流。非常敏捷。據其母云。在胎中時。卽時聞語聲。但細小如蠅聲耳。彼國醫界中人。刻正注意研究。期必得其真相。友人聞之。堅謂此卽是我國前人應聲病。予曰。非也。人云亦云。是爲應聲。今此女腹中之語。係與他人相問答。豈可強名以應聲耶。若以關亡者妄加揣度。尤屬非是。

百四九 雙舌

樓英醫學綱目。載有重舌一證。言舌根下生物如舌而小者。曰重舌。此不過形狀略似耳。曾見一人。雙舌重生。上舌圓厚。下舌稍尖而薄。根出一系。食入則上舌動。言出則下舌動。醫者以非痰包。無所施其剪。又非血囊。無由用其針。尤幸不甚障礙。亦竟置之。今此人猶在也。寧非咄咄怪事。

百五十 龜頭生菌

無錫唐某。諱其名。塾師也。向居城內書院街。二十餘年中。兩娶而皆不育。友人某。擬贈以侍婢。乃垂涕言曰。某無福。某旣俾亡妻守寡而終。今

又使拙荆抑鬱以居。捫心自責。抱恨終天。若贈以妾。重吾過也。友以其言有異。因詰之。則言龜頭盡處實產一肉菌。大六七分。高可半寸。陽事舉。則痛徹心肺。痿則如常。故前妻雖亡。猶是處子。荆人在室。尙未破瓜。嗟余廢人。年年獨宿。豈果兩妻之不育哉。友言西醫最精剖割。盍至蘇州天賜莊博習醫院割去之。答云。恐放血死。故始終不敢也。友爲之嗟訝不置。

百五一 耳毛

崇明錢清卿。右耳內有黑毛三莖。引之長尺八。捨之則旋曲。如蜂蝶之捲鬚。充塞耳竅。聽官爲之不聰。一日。走整容店中。引出耳毛。囑匠人細察根之所在。如言視之。竟不能得。放手間。剃刀誤斷其一。乃有血自毛端出。匠人大窘。急取髮絲緊縛毛端。血始止。人無知之者。

百五二 陰中怪物

瀏陽郭子卿。棄儒而賈。新婚彌月。卽客金陵。三年不還。離鸞別鶴。兩地



相思。商諸居停。薄言旋歸。久別重逢。喜可知也。今夕何夕。三星在戶。牀第之樂。匪可言喻。豈知兩性相觸。曾未雲雨。子卿忽大叫一聲而亡。其妻駭極。亟捫男陰。詎已無有。覓火燭之。血流如注。己身亦在血泊中。不明所以。但擗踊號咷。家中老嫗。聞聲趨視。鄰舍亦款關來詢。嫗皇遽間以所見對。東鄰痞棍癩皮阿三聞悉。卽以郭氏婦謀殺親夫鳴於官。邑宰高鳳鳴。賢令尹也。立命駕蒞驗。時子卿猶無以歛。妻則撫屍哀慟。願以身殉。令細審情狀。察言觀色。知子卿之死。必有他故。隨諭里正速將死者棺斂。其妻併一千人證。俱帶案訊辦。回署升堂。先訊阿三。供稱確是謀殺。姦夫頃已在逃。續訊其他鄰人。僉云郭婦向無不端事。續訊里正。供如諸鄰。最後訊郭妻。則云早擬從夫地下。特求一明而死耳。官溫言諭之曰。爾夫之死。必爲爾明之。爾之冤。必爲爾白之。遂命里正退。諸鄰及阿三俱暫行羈押。僅帶郭妻赴內堂聽審。郭妻見審問者。乃縣官太夫人也。始赧顏具白情狀。因密傳官媒。就內堂屏人驗郭妻私處。果

獲子卿陰具。盡力扯之。乃出。則有一物。緊嚙龜頭不放。四足蛇身。狀如守宮。長二寸許。色若渥丹。太夫人曰。是矣。命持以示令。時已三鼓。再呼升堂。立答阿三千板。荷枷三月。治其誣告之罪。諸鄰無干。省釋。郭妻之冤。遂由是得白。然究不知是何怪也。

百五三 長短臂

吾鄉有擔水夫阿榮者。丹陽人。年事可三十來。予家日用飲料。亦彼按日擔送者。其兩臂之構造特奇。伸左臂。屈右臂。則左臂長一臂有半。而右臂祇餘五寸。伸右臂。屈左臂。則右臂長。左臂短。亦如之。苟兩臂同屈。則左右並短十之三。兩臂齊伸。則左右並長十之三。頗疑其曾習幻術。既乃知其實一蠢夫。因思臂有關節。非若戶樞之可以入短出長。而其或長或短。恰又一視夫屈伸。解人真難索哉。

百五四 多節指

駢枝。指異也。乃尤有異於是者。大兄業師臨桂李拔元先生。有一妾。挈

居署中。予年九齡。好嬉戲。凡堂上所莫予禁者。足迹靡不至。李妾之臥室。其一也。一日詣彼所。見李妾呼以師母。彼乃大樂。召予前。出薄荷糖餉予。彼左手適觸予小手。忽見其中指殊長。因問曰。師母。此指何獨長。則云。此中指也。本長於他指。而我此手之中指。獨多一節。故彌形其長耳。曰。得毋不適否。曰。僅握拳時障礙而已。予甚異之。後此每去。必一索觀此多節之指而後快。

百五五 半截美人

波斯有一人。上截男形。下截女身。上截濃眉大眼。聲音重濁。髭根繞腮。有喉結。無乳峯。下截骨盆開廣。腰細臀高。女陰儼然。足亦瘦小。謂發育不完全歟。則眉何濃也。眼何大也。聲音胡重濁也。髭根胡繞腮也。喉結胡發生也。謂是男而非女歟。則骨盆何開廣也。女陰何儼然也。進化歟。退化歟。洵疑問矣。

百五六 人身奇光

一賣冥鏹者。肩挑長錠。夜行僻所。遙見迎面有徑寸大青碧光。閃爍不定。由遠而近。行愈近。光愈大。凝視之。目幾爲之炫。此人以爲怪也。然自恃膽壯。擬揮扁擔直前撲之。不意放光之人。亦見此人之一團黑影。搖搖近己身。加風吹長錠。絳縹作聲。以爲必一鬼也。亦擬伸手攫之。及近前。互相搏。一謂是擒妖。一謂是捉鬼。邏者至。高舉諸葛燈照之。方知此既非妖。彼亦非鬼。放光者光既不見。賣冥鏹者長錠亦化作青龍。騰空而去。始各罷手。據賣冥鏹者言。實見彼人身放奇光。但其所在不能確指。髣髴是從頂上出。今西儒亦言人腦部能現光彩。但甚微弱。此人之光如是明耀。豈體中之電氣充盛歟。抑賣冥鏹者之視力銳敏耶。

百五七 舌腫

有人舌腫。舒出口外。無敢醫者。一村人云。偶有此藥。歸而取至。乃二紙撚以燈燒之。取煙熏舌。隨即消縮。衆問其方。村人云。吾家舊有一牛。舌亦腫脹出口。人教以蓖麻油蘸紙作撚。燒煙熏之而愈。因以治人亦驗。

又一士人夜歸。其妻熟寢。士人撼之。妻問何事。不答。又撼之。其妻驚視之。舌腫已滿口。不能出聲。急訪醫。得一叟。負囊而至。用藥搽之。比曉復舊。問之。乃蒲黃一物。中醫家據內經熱勝則腫一語。謂是心脾之火併於舌。故令舌腫滿口。或且舒出。其然乎。其不然乎。

百五八 睡病

非洲黑奴。多有一種奇異之睡病。將發之前。必先依定時發熱。有類患瘧。俄而頸項腫脹。不飲不食。惟耽睡眠。往往因之而死。此病善蔓延。據西人調查。當年英領烏牙特地方。流行殆遍。又布穀寨地方。黑人罹睡病死者。歲可二萬人。至於今。戶口蕭條。幾成荒蕪之部落矣。白人及牲畜。亦多被感染。最近醫學家精心研究。方知此病實由鞭毛蟲入人體中而發。而該鞭毛蟲之得入人體。則原於一種螫蠅之介紹。幸蠅之所在。有一定區域。謂之蠅帶。在蠅帶以外者。受害頗少云。

百五九 夜眼

陳書馬樞傳。凡樞所居處。盜賊不入。依託者常數百家。樞目精洞黃。能視闇中物。此言晝視之外。兼能夜視也。白下一成衣匠。與此類似。而實不同。日中兩眼羞明。畏光特甚。常閉目索食。家人厭之。促其晝寢。入夜則獨坐暗室中。壓線製衣。視他人對光裁縫者特佳。父執傳有衡明府。聽鼓金陵。寓去成衣家。可一箭遙。屢授衣使成之。果皆針針縝密。因共嘆其異。稱曰夜眼云。

百六十 怪癖

宋范廷召性惡飛禽。所至處。彈射殆絕。尤不喜驢鳴。必擊殺之。北齊元坦性好畋漁。無日不出。秋冬獵雉兔。春夏捕魚蟹。鷹犬常數百頭。自言寧三日不食。不能一日不獵。唐李靖弟客師。亦喜馳獵。四時從禽。無暫止息。鳥獸皆識之。每出則鳥鵲隨逐而噪。野人謂之鳥賊。夫人與禽獸爲惡。而必捕之殺之。其褊急亦甚矣。因而成癖。非怪而何。

百六一 場頂



嘗讀後漢東夷傳。言韓俗兒生欲令頭扁。皆壓之以石。此由人爲。非天生者。依予所見。乃大不然。汴洛間一小兒。頭頂平塌如削。殊不堪入目。詢其母。云產下卽然。予以爲頂平如此。其腦髓必不充足。智慧必然缺乏。幸而成長。亦是癡騃。荏苒五年。是兒猶在。聞諸鄰里。果笨伯也。然則大腦多智之說。信不誣矣。

百六二 少節指

曾子宣丞相家。男女手指。皆少指端一節。外甥亦然。或云。襄陽魏道輔家。世指少一節。道輔之姊嫁子宣。故子孫肖其外氏。此與前多節指同。其壤異。而又適相反。據胎生學者言。此等畸形病。實具有遺傳性。魏家之病。曾氏受之。遞傳不替。職是故也。然亦罕聞矣。

百六三 肥病

晉南陽王模子保。體質豐偉。嘗自稱重八百斤。袁彖體充腴。有異於衆。每從車駕射雉在郊野。數人推扶。乃能徒步。其肥有如此。一昨觀劇天

聲。旁座一甬產婦。年事可三十來。以一身占兩椅。猶嫌其促。自語云。從前瘦小時。每恨其不肥。今一肥至此。又恨其不瘦。實見到語也。

百六四 毫異

晉劉元海姿儀魁偉。身長八尺四寸。鬚長三尺餘。當心有赤毫毛三根。長三尺六寸。唐則天初誕。右手中指有黑毫。左旋如黑子。引之尺餘。元察罕帖木兒。左頰亦有三毫。怒則毫皆直指。元海之毫赤。又長甚異也。則天之毫能旋異也。帖木兒之毫怒則指異也。毫不足異之三者之毫。則誠異矣。

百六五 恥短

後漢馮勤兄弟。形皆偉壯。惟勤祖父偃。長不滿七尺。常自恥短陋。恐子孫之似也。乃爲子伉娶長妻。伉生勤。長八尺三寸。此與前漢張蒼家世有相類者。蒼父長不滿五尺。及生蒼。長八尺餘。爲侯丞相。蒼子復長。及孫。類長六尺餘。遂坐法失侯。古今人以短爲病。以長爲美。往往然也。然



矮陋如黃顰兒。固亦有肉杙之號矣。形體之修短。又惡足爲恥耶。

百六六 兩面

後漢書東夷傳云。東沃沮又於岸際。見一人乘破船。頂中復有面。與語不通。不食而死。史臣紀載。言過其實。固不足怪。乃徵諸近聞。知天壤間果有此等怪物。往予應試金陵。館夫子廟前管姓家。管有僕。名阿林。當地人也。或曰。其婦來訪之。手挈一孩。適經予門。孩前後各一面。五官畢具。但祇兩耳。予駭而爲之貽。旣晤逆旅主人。因道及之。主人曰。余乍見是兒。亦幾望而卻步。今則司空見慣。或戲之焉。昨余歸。見阿林婦又挈之來。余適持有菊花。乃置其前面之目前。而令其後面之口。答所見爲何物。復探懷出仁丹數粒。納後面口中。而問其前面之目。亦有所見否。則此奇異之五官。彼此乃不能通用也。惜予未得試之。至今猶以爲恨。

百六七 骨軟病

日本橫濱長與容三郎。生十四年矣。全身猶如無骨。頭蓋柔軟。前有贅

骨。脊梁後屈。且向側彎。胸骨外凸。四肢屈曲。臀部欹斜。步行槃散。似西洋之佝僂病。而年齒加長。友人汪君嘗親見之。昔北齊河西王仁幾。生而無骨。不自支持。殆近是矣。其卽莊子所謂曲僂發背。上有五管。頤隱於齊。肩高於頂歟。

百六八 流精

從弟某。素行端嚴。不喜漁色。悼亡三年。始取繼室。詰旦賀者方盈門。弟乃舍而詣余所。言今番新人不能做。一做病卽來。問所以。則曰。精關一開。竟收閉不住也。勉慰之而去。詎後此且有加無已。夜以繼日。汨汨其來。惟行動時則止而不流。服諸藥俱無效。商於余。亦莫敢臧否。兩月後。更晤弟。則髓消肉減。神昏氣奪。毛瘁色夭。旣聞其服司丕爾明。服牡羊生舉丸液。服韋廉士補丸。均不過有小效。卒以服血色素而愈。究不知是何因也。

百六九 肉顫

從弟既患流精。同時更有肉顫異症。據言全身皮裏肉外。處處顫動。無時或息。一若受電氣激刺而震動者然。由是感動異常。困苦特甚。尤奇者。蜜月後。弟婦亦患肉顫。但勢少弱耳。交會一度。奇疾叢生。夫倡於前。婦隨於後。豈造物小兒。故施其播弄之手段歟。不然。何怪病之多也。

### 百七十 鬼交

婦女與鬼交。吳語謂之神和病。日本謂之狐憑病。舊小說中輒侈言之。初以爲談狐說鬼。文人結習耳。今乃知予識見之陋。予家墳丁。名三元。三元有二女。長阿翠。次阿玉。阿翠十七歲時。忽有鬼魅崇之。雖白晝。亦公然不避。自言神美風姿。善舉止。其妹戲叩以祕事。則言房中樂。匪可言喻。然自是疋羸殊常矣。三元力既綿薄。又明知醫鮮能。故惟燒香許愿。聊盡人事而已。卒無法治之也。如是二年餘。爲崇者忽言去。謂緣盡於此。阿翠叩所往。則言須涉洞庭。自後病卽霍然愈。三元爲余言之。鑿鑿。讀者幸勿謂余亦迷信也。

附怪生十四則

一 人妖

山陽縣屬東鄉施家渡周姓女。年已及壯。並無外遇。近忽腹大如鼓。時作奇響。家人疑爲暗疾。延醫調治。終屬無效。某日忽產下一胎。非人非畜。狀類肉蛋。中間略似有一長口。時伸時縮。胎既下。女遂大叫而絕。死時血流遍體。狀至悽慘。又上海大南門內陳箍桶橋東首喬家浜朱姓婦。產生一物。上身似壁虎。下體類田雞。兩耳在肩。尾闖下無臀。遍體生毛。人皆驚異。又常州東鄉余家橋吳姓婦。產生一孩。非男非女。口生頷下。胎髮紅色。啼聲怪異。聞之心悸。謂非人妖而何。

二 一孕二十年

鎮江三江營張姓妻。五十歲時。忽然有娠。今已七十有一矣。歷年二十年。尙未生產。尤奇者。胎在腹中。能自言語。稱是釋迦弟子。須再經二三年。方可出胎。聞見確鑿。非不經之談也。

### 三 產器物

萬歷丁未吳縣石湖民陳妻許氏懷妊。過期不產。一夕腹痛甚。忽產下一胞。剖而視之。乃一秤銀銅法馬子也。權之重十兩。背有鑄成字樣。爲萬歷二十二年置七字。鄰里傳玩之。此物入胎。其理殊不可解。又徐州吳氏產子五十四日。小兒忽嘔出三角物。洗之。得大錢七十三文。輪廓周正。皆有年號。更奇。

### 四 羊兒

浙江蕭山縣北鄉農民陳三九。家境小康。多專蓄牛羊豕之牝者。爲其營業。生息蕃滋。獲利頗厚。一日。爲牝羊胎產之朝。家人聞呱呱聲。急往視之。見所產係一小孩。面白如雪。身及四肢。絲毫無異人處。且體格豐偉。啼聲洪亮。一時傳播鄉里。遠近往觀者絡繹不絕。該農民託人覓乳媪爲之乳哺矣。

### 五 腹中怪

江蘇海門縣農民趙某之妻。懷孕十餘月。忽舉一子。面如怪獸。頂生兩角。有足無手。不動亦不哭。農民異之。遍詢諸人。或云。凡與怪物交合者。必生異胎。此必觸犯妖氣所致耳。人言如此。未審究何因也。

六 異胎

安慶城北五區境內楊家塘丁某之婦。年約三十歲。懷孕已近十月。某夜忽腹痛難忍。遂產一女孩。面黑嘴尖。頭似蓮花瓣。手足如常。墮地後。並無哭聲。僅奄奄一息。約六七時即死。

七 猪女

山西開化寺趙某之媳胡氏。年僅十八。產一女怪。其首左半猪形。右半則有一凹處。兩手均如猪蹄。自腹以下。頗似人形。產下便死。經穩婆等急匿他所。產婦聞是怪物。欲求一見。其姑不允。固請。乃令一見。不意覩怪之後。心悸成疾。竟致不起。

八 品字胎

江西安福縣鳳林橋市王光照妻。年逾四旬。從未生育。屢治無效。已不作是想矣。偶遇道士。付以丸藥三枚。食之。越數日。便覺懷孕。夫婦喜不自勝。逾年分娩。連生三子。初次與二次所生者。皆身體完全。與常兒無異。至最後產出者。則無手無足。竟體如渥丹。啼哭有聲。動躍驚人。甫三四日。母子俱亡。

### 九 兩陰相連

廣東鳳城北門某氏婦。懷孕數月。屢產不下。曾延某某女醫生診視。亦皆束手無策。續邀珮江某媪來。費盡手法。始行產出。乃男女兩體。對面相抱。察其下體。的是相連。其狀一若交合者然。因摧殘過久。未幾即死。又安徽懷寧縣署旁周某之婦。產一嬰孩。其私處臥則爲女形。立則化男形。其他身體手足。吸乳啼哭。則概如常兒。至今尙生存云。

### 十 兩首四腿

鎮江屬江北田家橋地方某姓婦。娠十三月而後生。維時備受痛楚。胎



下而婦已氣絕矣。視所產男也。然兩首一身。兩臂四腿。生三日。猶呱呱以泣。數十里內。無不知之。

一一 猴人

廣西岑溪縣一民婦。夫爲人誣扳。下獄瘐死。婦遂流爲乞丐。蓄大猴一。日則牽其出。演戲博資。夜則與同寢處。無何。腹膨亨。一日。正行至西城根。忽腹痛甚。遂據地偃臥。不食頃而產。雖是男孩。顧左面似猴。右面似人。上肢猴形。下肢人形。臀赤逾恒。私處微有毛。豈胎胚旣爲猴。父人母所構成。必各肖其半。乃得其平歟。

一二 人蛇並生

湖南辰谿柳子建明經。爲山東兗郡廖公墓中上客。一日得家報。言大姪婦已免身。一產兩胎。人蛇各一。蛇長二尺許。遍體紅鱗。繞兒身上下。時伸縮其歧裂之舌。恰與兒口相對。旣墮地。蛇卽蜿蜒下。蟠屈牀隅。其兒則哺乳如常。了無異人處。姑以乳授蛇。亦伸頸吮食。究竟作何處置。



子建閱信後。憂慮萬狀。適其居停至。詰之。因示以函。公微哂曰。深山大澤。實生龍蛇。餉而送之郊原。何不可之有。

### 一三 肉塊

靖江民人俞姓妻。嫁後初產。下一肉塊。無頭無足。大如升而形扁。通體有眼。趨趨然跳躍不止。且腥臭難聞。居民爭來觀之。則其家人已盛以木盤。擬乘船而投諸江中矣。舟抵江心。持盤步至船頭。此肉塊忽又躍起。以盤淺跳高。瞥眼間竟自躍下。則有巨鱗大口諸水族。羣來噉食。舟且爲之震搖。不識是何物也。幸產婦未知。得以無恙。

### 一四 老翁

海門世家陳某孫婦秦氏。曾小產一次。越三年。再娠。喜甚。迨呱呱墮地。乃是一白髮老翁。且能言語。能行走。所言彷彿是秦晉口聲。閤家人震恐。謀所以禳之。老翁語之曰。毋恐。我誤轉胎。會當告別耳。浹旬果死。以是知天下事。有不可以常理論者。

世界奇病談

八八

世界奇病談終

